

5

T 3150/2432.83

CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
MAY 7 1938

代州志

人物

册四

人物志

哈佛大學漢和  
圖書館珍藏印

史昭勸懲熾惡並見志表遺芳職專揚善楚材晉  
用世號多賢山川鍾毓輝映後先維三不朽紀德  
銘功匹夫匹婦易俗移風民之秉彜好是懿德斯  
愛斯傳循名責實志人物

名宦

周

李牧趙北邊良將也常居代鴈門備匈奴匈奴入輒  
收保不戰匈奴以牧爲怯趙邊兵亦以爲吾將怯

然日厚賞邊士而不用人皆願一戰牧乃縱畜牧以誘匈奴單于聞之大率衆來牧設奇陣張左右翼擊之破殺匈奴十餘萬騎單于奔走十餘歲不敢近趙邊城

秦

蒙恬因家世得爲秦將始皇并天下使恬將三十萬衆北拒匈奴築長城太子扶蘇監其軍趙高立胡亥矯詔殺扶蘇並賜恬死恬對使者曰自吾先人及子孫積功信於秦三世今將三十萬兵其勢足

以倍畔自知必死而守義者不敢辱先人之教以無忘先王遂吞藥自殺

漢

周勃以中涓從高帝起兵於沛所將卒當馳道爲多累功爵列侯食邑於絳後攻韓王信軍於銅鞮破之降太原六城遷太尉從擊陳豨屠馬邑得豨將宋最鴈門守國

漢書法顯古曰國者鴈門守之名

遂定鴈門郡十

七縣

衛青鄭季子冒姓衛少爲人奴以婦子夫貴幸補侍

中元光六年拜車騎將軍擊匈奴入上谷功爵  
關內侯元朔元年將三萬騎出鴈門斬首數千遂  
取河南地爲朔方郡封長平侯後匈奴歲入鴈門  
定襄殺掠甚衆詔青出高闕破走右賢王得右賢  
裨王十餘人漢書師古注曰裨王小王也猶言裨將也衆男女萬五千  
餘人畜數十百萬天子使使者持大將軍印卽軍  
中拜青爲大將軍諸將皆以兵屬

李廣爲鴈門雲中太守軍行無部曲行陣就善草水  
人人自便以衛尉從大將軍青擊匈奴出鴈門爲

敵所生得廣佯死置二兩馬間絡而盛之卧行十餘  
里睨其旁有番兒騎善馬躍上馬挾兒行數十里  
得餘軍追騎數百至復取兒弓射殺追騎後拜北  
平太守匈奴畏之號飛將軍

程不識孝景時以數直諫爲大中大夫爲人廉謹於  
文法元光元年爲車騎將軍屯鴈門正部曲行伍  
營陣擊刁斗吏治軍簿至明軍不得自便時李廣  
爲驍騎將軍屯雲中不識曰李將軍極簡易然敵  
卒犯之無以禁而其士亦安佚樂爲之死我軍雖

煩擾而敵亦不得犯我是時漢邊郡程不識李廣皆爲名將

鄧都爲中郎治先嚴酷號曰蒼鷹中危法免歸起拜鴈門太守得便宜從事匈奴素聞鄧都節舉邊兵引去竟都死不近鴈門爲偶人象都令騎馳射莫能中其見憚如此

趙充國字翁孫隴西上邽人始爲騎士以六郡良家子善騎射補羽林爲人沉勇有大畧少好將帥之節而學兵法通知邊事武帝時擢後將軍及尊立

宣帝封營平侯本始中爲蒲類將軍復爲後將軍少府匈奴大發十餘萬騎欲入侵遣充國將四萬騎屯緣邊九郡單于聞之引去甘露二年卒謚曰壯侯後與霍光等列畫未央宮

段會宗字子松天水上邽人竟寧中爲西域都護西域敬其威信三歲更盡還拜浦郡太守以單于當朝徙爲鴈門太守數年坐法免西域諸國上書願得會宗陽朔中復爲都護後賜爵關內侯

杜茂字諸公南陽冠軍人初歸光武於河北當從征

伐建武三年以功拜驃騎大將軍七年詔引兵北屯田晉陽廣武以備邊九年與鴈門太守郭涼擊盧芳將尹由於繁峙芳將賈覽率騎萬餘救之茂戰軍敗引入樓煩城時盧芳據高柳數寇邊十二年遣謁者段忠將衆郡弛刑配茂鎮守北邊因發邊卒築亭候修烽火又發委輸金帛繒絮供給軍士并賜邊民冠蓋相望茂亦建屯田驢車轉運尹由將賈丹等遂詣鴈門太守郭涼降芳亡入塞北郭涼字公文右北平人壯猛而通經書多智畧從擊

彭寵有功封廣武侯建武九年爲鴈門太守與將軍杜茂擊盧芳將尹由於繁峙十二年尹由將賈丹霍匡解勝本鴈門人共殺由詣涼降涼上狀皆封爲列侯詔送委輸金帛賜茂涼軍吏及平城降民自是盧芳城邑稍稍來降涼誅其豪右郇氏之屬鎮撫羸弱旬月間鴈門且平芳遂亡入塞北帝擢涼子爲中郎宿衛左右

魏

牽招字子經安平觀津人初事袁紹後事魏黃初中

為鴈門太守郡在邊陲雖有侯望之備而寇鈔不  
斷招既教民戰陣又表復烏丸五百餘家租調使  
為偵候敵每犯塞輒逆擊摧破之吏民膽氣日銳  
通河西鮮卑附頭等十餘萬家繕治陘南故上館  
城置屯戍以鎮內外遠人大小莫不歸心諸叛亡  
雖親戚不敢匿藏咸悉收送於是野居晏閑寇賊  
靜息乃揀選有才識者詣太學受業還相授教數  
年中庠序大興又鑿原開渠注水城內民賴之太  
和初賜爵關內侯在郡十二年卒於官威風遠振

百姓追思之

傅容漁陽人繼率招為鴈門太守有名績

晉

索靖字幼安敦煌人舉賢良方正對策高第擢尚書  
郎靖草書與尚書令衛瓘齊名號一臺二妙在臺  
積年除鴈門太守太安末拜使持節監洛城諸軍  
事與賊戰大破之靖亦被傷而卒贈司空封安樂  
亭侯謚曰莊

北魏

梁越新興人博通經傳魏道武以其謹厚遷上大夫  
令授諸皇子經書明元初以師傅恩封祝阿侯出  
爲鴈門太守政尙寬平時稱良牧獲白雀以獻徵  
拜光祿大夫

北齊

斛斯萬善河南人驍勇果毅以軍功拜武賁郎將突  
厥圍鴈門萬善奮擊之所向皆破每敵至獨出當  
其鋒或下馬坐地引強弓射敵所中皆殪由是莫  
敢逼城十餘日竟退萬善之力也其後頗討羣盜

累遷至將軍卒

隋

楊素并州道行軍總管屢立戰功漢王諒反代命素  
將萬騎討之誅諒平代地遂命知代州素老於邊  
事號令嚴肅每將戰臨陣殺百人故士卒咸爭死  
敵戰輒勝

王頌字景彥太原祁縣人性至孝有文武幹局開皇  
中以平陳功拜代州刺史甚有惠政

馮孝慈仁壽中代州司馬驍勇善戰漢王諒舉兵遣



將來攻孝慈與總管李景等拒守後與楊義臣援  
兵擊賊大破之城賴以全

侯莫陳乂仁壽中儀同三司漢王諒之亂與李景等  
共守代州多謀畫工拒守之術

呂玉仁壽中代州司法叅軍漢王諒反玉驍勇善戰  
與總管李景等共相守禦城獲全

陳孝意河東人大業末爲鴈門郡丞時長吏多贓污  
孝意清節彌厲發奸摘伏動若有神吏民稱之劉  
武周反孝意與武賁郎將王智辨率兵討之戰於

下館城反爲所敗武周遂轉攻傍郡前郡丞楊長  
仁鴈門令王確等並桀黠爲無賴所歸謀應武周  
孝意陰知之族滅其家郡中戰慄莫敢異志武周  
引兵來攻孝意拒之每戰克捷堅守百餘日糧盡  
爲校尉張倫所殺

唐

李靖少倜儻翼大節曉兵法布衣時作書獻西嶽神  
隋末丞馬邑入唐以尙書令出守鴈門突厥侵太  
原靖選江淮兵進屯太谷以禦之諸將多失亡靖

軍獨完擢定襄道行軍總管將勁卒三千人由馬  
邑惡陽嶺襲定襄破頡利可汗十萬衆進封代國  
公

張公謹字宏慎魏州繁水人武德末以功累授左武  
侯將軍封定遠郡公貞觀元年拜代州都督上表  
請置屯田以省轉運又言前後時政十餘事並見  
納用遣李靖經畧突厥公謹爲副言突厥可取狀  
太宗納之破定襄敗頡利進封鄒國公轉襄州都  
督卒謚曰襄改封郟國公

張儉雍州新豐人貞觀初以軍功累遷朔州刺史頡  
利自恃強盛遺書稱勅緣邊通相承稟儉獨拒不  
受太宗聞而嘉之李靖平突厥有思結部貧窮離  
散儉招慰安集之其親屬在磧北者往來並不拘  
責但存紀綱羈縻而已及儉以母憂解朔州後將  
疑思結遽以奏聞議發兵進討仍起儉爲使儉單  
車入其部落召諸首領布腹心咸匍匐歸命便移  
就代州卽令檢校代州都督勸令營田數年豐稔  
慮其私蓄富實易生驕侈表請和糴擬充貯備蕃

人喜悅邊軍大收其利擊高麗封皖城郡公卒謚  
曰密

薛仁貴絳州龍門人以軍功歷右威衛大將軍封平  
陽郡公永淳元年拜右領軍衛將軍檢校代州都  
督擊突厥元珍於雲州敵問唐大將爲誰衆以薛  
仁貴對敵曰吾聞仁貴流豕州死久矣何以給我  
仁貴免胄示之面敵相顧失色下馬羅拜稍稍引  
去仁貴因進擊大破之其年卒贈左驍衛大將軍  
敬暉負大節饒智畧則天久視元年爲代州刺史梁

文惠公狄仁傑薦之拜中臺右丞神龍元年與張  
柬之崔元暉桓彥範袁恕已等誅張易之張昌宗  
迎中宗復位封平陽王  
杜希望京兆萬年人開元中爲代州都督召還京師  
對邊事元宗才之拜鄯州都督以邊功著終西河  
太守

賈循冀兆華原人有大畧爲邊將累功歷光祿卿安  
祿山兼河東節度表循兼鴈門太守爲副祿山趨  
東都使循守幽州與顏杲卿連謀遇害贈太尉謚

曰忠

王忠嗣代州別駕有風節至郡時大猾閉門歛跡恐  
犯卽弗得貸數出輕騎深入斬米施可汗築大同  
城徙軍實之併受降振武爲一城自是敵不敢侵  
雲中犯鴈門天寶初由大同節度使北討與敵遇  
桑乾三戰三克築城起朔方至雲中斥地甚遠  
李光進元和中爲代州刺史破賊有奇功弟光顏繼  
領是州皆以御史大夫領州事故軍中呼大夫而  
以大小別之光進光顏威望功畧足相當後光進

封安定王光顏終河東節度使

張光晟代州刺史大歷間敗回紇於羊虎谷嶧志爲陽武谷

後唐

王建立遼州榆社人爲代州虞侯將莊宗嘗遣女奴  
之代州祭奠女奴侵擾代人建立捕而笞之莊宗  
怒欲殺之明宗時爲刺史力庇獲免後封韓王

後周

柳開仕監察御史出知代州完城壕治戰具甚有方  
畧仍以金百兩錢數萬資貧生之不能葬父母者

宋

陳恕河北營田使改刺代州築城壘修戰具太祖知恕有心計招爲鹽鐵使

楊業太原人北漢建雄軍節度使歸宋爲代州刺史兼三交駐泊兵馬都部署屢敗遼師遷雲州觀察使仍判代州雍熙三年爲雲應路副都部署連接雲應寰朔四州命護四州民入內地力戰陳家谷口被執不食卒子延昭時以供奉官爲先鋒戰朔州城下流矢貫臂鬪益力仕至高陽關副都部署

孔守正開封浚儀人開寶中從何繼筠大敗遼師於

石嶺關太宗征晉陽分主城西洞屋率步卒大呼

先登繼與內侍蔡守恩等率騎兵力戰并軍遂潰

淳化初領代州部署連移并代夏綏麟府三鎮改

代夏二州部署真宗初復徙代州咸平初守正上

言四任鴈門邊亭久安願東北以自效人皆壯之

張齊賢曹州宛句人太祖幸西都嘗條陳十事太平

興國二年第進士雍熙三年代州楊業戰沒上訪

近臣可知代者齊賢請行授給事中知代州與部

署潘美同領緣邊兵馬時遼兵薄代副部懦怯請入壁齊賢曰不戰示之弱乃選廂軍二千人出且約潘美以并師來美兵行中使止之齊賢曰敵知美來不知美還乃使二百人距州西三十里列幟燃芻敵爲并師至駭而夜遁齊賢返至土陞砦大破之淳化二年拜叅知政事同平章事卒謚文定譚延美大名朝城人雍熙三年與田重進出飛狐北曰破恃衆易我宜出其不意先攻之卽麾騎軍直進遂獲大鵬翼端拱二年授邕州觀察使判亳州

兼知代州咸平中卒贈建武軍節度

劉文質字士彬保州保塞人太宗時以西京左藏庫副使爲岢嵐軍使賜金帶名馬祥符中爲石隰緣邊同都巡檢使天禧中知代州先是番部獲逃卒給絹二疋茶五斤卒皆論死時捕得百三十九人文質取二十九人以赦後論如法餘悉配隸他州再知代州卒

韓守英字德華開封祥符人爲入內高品從征河東數奉詔至石嶺關督戰取隆州歷并代路兵馬鈐

轄遼圍岢嵐軍與鈐轄張志言知府州折惟昌帥所部渡河抵朔州以牽敵勢遂破狼水砦俘數百人獲馬牛羊鎧甲以數萬計敵爲解去賜錦袍金帶以爲并代路都鈐轄建言本路宿兵多百姓困於飛輓今幸邊郡無事請留騎軍千餘人餘悉徙內地真宗曰邊臣能體朝廷恤民之意宜詔諸路視此行之後爲景福殿使延福宮使卒

馮行已皇祐中知代州管幹緣邊安撫事時河西番部盜耕屈野河西田言不宜以細故啟大釁但加

戒戢足矣五臺山寺調廂兵義勇繕葺爲除和糴穀三萬言不可損歲入之儲以事不急之務終金州觀察使

劉永年字君錫太原人仁宗時知代州遼人取西山木積千餘里輦載相屬於路前守不敢過問永年遣人焚之一夕盡事聞上稱善遼移檄捕縱火盜永年曰盜固有罪然發在我境何預汝事乃不敢復言上嘗問禦戎策對合旨書忠孝字以賜英宗時復知代州歷太原副都總管卒謚莊恪

武英字漢傑太原人仁宗時以右班殿直爲忻代州同巡檢會州將出獵留飲英曰今空郡而來萬一敵乘間入城奈何旣而敵百餘騎果入侵英領衆左右馳射悉擒獲之以功遷左班殿直後戰沒於好水川贈邢州觀察使

郭恩開封人仁宗時以崇儀使爲并代州鈐轄管勾麟府軍馬事戰敗於屈野河不屈死贈同州觀察使

王仲寶字器之密州高密人仁宗時爲澤潞晉絳

隰威勝軍巡檢使至官纔八日獲太行山宿賊八十人賜金帛緡錢遷內殿承制後爲并代州鈐轄加西上閣門使建言緣邊博糴屬羌苦之請寬法使得復業以捍邊境久之遷東上閣門使元昊侵延州仲寶將兵至賀蘭谷以分兵勢敗番將羅逋於長雞嶺後又以磁州防禦使知代州  
呂大忠字進伯京兆藍田人第進士爲晉城令熙寧中令與劉忱使遼議代北地會父喪起知代州遼使蕭素梁穎至代設次據主席大忠與之爭乃移



次長城北換西上閣門使知石州大忠數與素穎會屢以理折之素穎少屈已而復使蕭禧來求代北地神宗召執政與大忠劉忱議將從其請大忠曰彼遣一使卽與地五百里若使魏王英弼來求關南則何如神宗曰卿是何言也對曰陛下旣以臣言爲不然恐不可啟其漸忱曰大忠之言社稷大計願陛下熟思之議卒不決罷大忠終喪其後竟以分水嶺爲界大忠仕至寶文閣直學士

劉舜卿字希元開封人神宗時知代州遼遣謀盜西

關鎖舜卿密易舊鑄而大之數日遼以鎖來歸舜卿曰吾未嘗亡鎖也引視納之不能受慚去誅謀者仕至步軍副都指揮使卒謚毅敏舜卿知書曉吏事謹文法善料敵著名北州

周永清字肅之靈州人以廕入仕熙寧中知代州遼求地命韓縝分畫永清貳焉入對言疆境不可輕與人臣職守土不願行固遣之復上章陳利害竟以母病辭終東上閣門使

郭遵開封人以左班殿直爲并代路巡檢遷延州西

路都巡檢使從劉平力戰歿特贈果州團練使遵  
用鐵杵槍槊共重九十斤

姚孝錫豐縣人徽宗時調代州兵曹金兵入鴈門州  
將議以城降官屬惶懼孝錫投牀大斲畧不爲意  
大府遂注孝錫爲五臺簿因家五臺善治生歲饑  
出粟萬石賑之全活甚衆

史抗濟源人宣和末爲代州沿邊安撫副使金圍代  
急抗夜呼其二子稽古稽哲謂曰吾昔語用事者  
鴈門控制一道宜擇帥增戍以謀未形之患若使

橫流則無所措矣言雖切皆不吾省今重圍旣固  
外援不至吾用六壬術占之明日城必陷吾將死  
事汝輩亦勿以妻子爲念也能聽吾言當令家屬  
自裁然後同赴義二子泣曰唯命明日城果破父  
子三人突圍力戰死於城隅

王忠植紹興十年知代州舉兵復石代等十一州遂  
以爲建寧軍承宣使又爲河東路經畧安撫使胡  
世將命救慶陽叛將趙惟清執之令降金不屈死  
贈奉國軍節度使謚義節

金

完顏衷中都司屬司人世祖之曾孫也爲代州宣銳  
軍都指揮使歲旱州委禱雨於五臺靈潭步致其  
水雨隨降人爲刻石紀之後除順義軍節度使陞  
辭賜金幣特寵異之生平孝悌貞謹深悉金源婚  
禮婚嫁每令衷相之治復有能稱  
趙晦爲代州士曹善篆隸詩筆高雅有集傳於世與  
宇文虛中有舊時守崞縣聞虛中以使事羈平城  
遂駕短轅下澤與虛中相聚凡旬日而歸虛中爲

賦詩以識一時之事

與敦醜和尚爲代州經畧使貞祐四年八月元兵攻  
代州和尚禦戰敗績身被數創就執不屈死

明

陸亨晉江人開國功封吉安侯洪武四年鎮守鴈門  
繕甲練兵戎伍整肅州城關堡皆所營建至今賴  
之

侯彥實建昌人洪武間知代州政教兼舉後陞應天  
治中

成璉直隸興化人洪武間任代州學正博學高才日以教化諸生爲務不以時當肇造少事苟且尋薦知蔚州累官北平右參政贈吏部侍郎

曹爾寧晉人宣德二年以舉人授代州學正有文名課諸生頃刻十餘草立就尋以年冲乞煩劇自效改太和典史後舉進士第一人授翰林院修撰累官內閣大學士死土木之難贈太傅謚文忠

周安江南鳳陽人襲振武衛指揮僉事宣德元年從征交趾奮勇身入重地殺賊數十人賊益衆圍之

格鬪死弟讓等十二人俱戰死事聞遣進士江奎

諭祭於家又有周鏞者衛指揮使正德七年守偏

關戰死王鏗衛百戶嘉靖八年土棚戰死汪滄者

衛百戶素梟勇嘉靖二十年敵大入滹斬殺十餘

騎馬蹶爲敵所屠同時戰死有指揮使曹桓公印

衛千戶嘉靖三十二年戰劉家庄矢盡同趙雲鳳

戰死東路營中軍高宗泰嘉靖三十二年戰死麻

布袋溝衛武舉王光先嘉靖四十年戰死西廓

孫壘居庸人形姿雄偉有方畧以叅將守鴈門勤惜

五臺人州志卷之四  
其  
戍卒賓禮儒士且禁戢士伍毋得騷擾百姓故代人稱頌之

朱銳齊河人景泰間知五臺縣抑暴扶良修廢舉墜境內清肅後陞知代州多惠政及告歸道出五臺民留三載敬愛不殊疇昔

周宣龍溪進士成化間太僕少卿考牧維勤九年考滿陞正卿寺之設卿自此始宣有學行暇日與生徒講解多所成就今代士多治書經皆所傳授

朱釗章邱人成化間知代州至日詢民疾苦得其詳

措置有條歲旱步行三十里禱於勾注陞神爲文自陳其奉職無狀禱畢雨隨至

郝槃武剛人宏治間任代州州判仁慈明敏督理稅務寬嚴得中有劉王者家甚貧逋稅多鬻妻償之槃聞之曰奈何生離人之妻爲捐俸贖還

秦偉三原人正德戊寅任鴈門兵備副使剛直不畏權右小吏貪墨及強宗怙勢者望之斂跡

許銘宛平人進士正德間任太僕卿爲政暇輒與代士講論經史立課法以勸勵之一時士嗜文學科

日多出其門

張爔通志作緩直隸滄州人正德間以舉人任代州知州

廉敏熟法律居官以幹濟稱衙署學舍頽廢者悉為修葺又以滹沱巨津病涉者眾創橋濟之

陳伯安錦衣衛人嘉靖己丑任代州兵備副使伯安先為御史抗太監劉瑾謫外任漸起刑部郎中諫南巡罰跪門者五晝夜居代時更持風裁儲糧修邊隱然有方面之重

郭宗臯福山人嘉靖戊戌任代州兵備副使自奉儉

約而法令嚴整豪強潛伏撫民以恩疾苦咸得自達聞訃奔喪即日徒步歸送者萬餘人中坐構戎隆慶初起廢歷南京兵部尙書

王鏞字宗周灤州人嘉靖間進士授評事選御史按江西河南嘗語其屬曰當與而不與者為善人遺害也當革而不革者為惡人殖利也巡視之所輒奏去其甚者宰執銜之出為山西副使備兵代州時有邊警而代當其衝鎬禦備免患銜者媒孽其間左遷湖廣轉山東復轉山西副使尋遷湖廣布

直隸代州志 卷之四  
政使擢都御史巡撫寧夏忤嵩歸里

胡松滁州人嘉靖壬寅任山西督學使陳邊事十三條擢叅政備兵三關疏辭不允抵任後修營壘市戰馬募丁壯甫經有序敵適大至提督不能備委罪松松素不當分宜權相心又與某御史有隙某因力排松以快分宜乃削松籍家居十五年起叅政進都御史平江西賊終吏部尙書謚莊肅

李士元河南洛陽人嘉靖間以舉人任代州知州州當孔道使客旁午民苦供億士元特設支房命謹

愿吏掌之上官遣吏往來每坐索錢物不應輒鞭捶館人士元命如數給之未出境已具文詳報後雖強畀之弗敢受矣尋被議去州人思之弗置

李玳霸州人嘉靖甲子任代州兵備副使飲水茹蘖出於天性而愷悌和穆卽村氓下卒俱若不知玳爲憲使至於綜理百務備禦廣武往來就督撫議未嘗一入其署郡人士以三字頌之曰清勤仁而愚民則曰爲李佛

施相本衛人號雙山少孤善草書初授振武衛指揮

直隸代州志 卷之四  
僉事嘉靖三十四年掌衛事多平反大獄有母訴  
子不孝者置之獄給其母曰爾子斃獄中其母大  
慟因出其子鞭而諭之遂爲母子如初邊有叛人  
偵我虛實生得二人晉世職一階後守備平刑歸  
復治衛事惠政尤多衛人感之

葉露新雲南人隆慶間以舉人任代州知州永蘖自  
矢執法甚嚴有犯者無少貸時人比之包孝肅

周仕字汝信三原人萬歷間進士初知鍾祥縣力抗  
強璫績著循良歷仕兵部郎中晉秩叅政治兵鴈

門擢山西按察使所至有聲飲水茹蘖一介必嚴  
歸之日環堵蕭然

南逢吉號姜泉渭南人以易舉進士高第授儀制司  
主事骨氣丰稜峻潔而果斷由雲南督學副使陞  
鴈門兵備諭三關將士循習令甲講明陣法數巡  
關外軍聲大振上備邊便宜五事語觸忌諱罷歸  
著有姜泉集越中紀傳若干卷藏於家註解會稽  
三賦刻在會稽郡中

南居益字思受渭南人少厲操行舉萬歷二十九年



進士累官山西提學副使鴈門叅政繕治亭障省費萬計歷按察使左右布政使並在山西天啟二年入爲太僕卿崇正時晉工部尙書削籍歸十六年賊陷渭南加炮烙不屈死

黃思道浙江仁和人萬歷間以舉人在代州知州素廉能涖任時適大閱部院使者一時俱集費叢不支思道調度有方不待嚴督胥早辦尋卒於官幾無以殮民立祠祀之

張惟誠永清人萬歷間以進士任鴈門兵備使修舉

廢墜多所營置墾塞下田萬餘畝歲收穀萬石建補助厥儲之以貸軍民之不足者春借秋還不責其息又建平糴倉穀賤時糴於民穀貴時照原值糴之又爲供應庫以給驛使紡織局以課女紅贍士田以惠儒林醫藥局以濟貧病施粥廳以補饑黎施棺所以澤窮骸農器庫以勤南畝布縷庫以周裋褐室家庫以體人情無息庫以恤私貸至若嚴邊防修武備固封守猷爲幹濟居然古名臣風焉後陞本省叅政

周宏禴湖廣麻城人以戶部主事謫代州州判忠謹  
 敢言風采震朝右及洩代佐州守與除利害加意  
 學校集一時俊士課之讀授以文法嘗隨直指巡  
 部多所平反纂修州志

牛大任代州知州祀名宦年貫事蹟無考

閻夢夔河南鹿邑人進士崇正末為代州叅政城破

抗節死

通志作  
叅將誤

周遇吉字萃宇錦州衛人少有勇力入行伍積功至  
 京營遊擊崇正九年都城被兵遇吉數血戰有功

進秩前鋒營副將從孫應元等討賊河南屢戰皆

大捷破胡可受於浙川降其全部從楊嗣昌討張

獻忠遇吉扼守槐樹關賊不敢犯大破羅汝才於

豐邑坪又與黃得功破賊鳳陽敗李青山於壽張

殲其黨幾盡十五年山西總兵許定國有罪論死

以遇吉代之明年十二月李自成陷全陝將犯山

西遇吉分兵扼黃河上流以下流蒲坂屬之巡撫

蔡懋德平陽守將陳尙智遣使迎賊太原遂陷懋

德死之賊乘勢陷忻州圍代州遇吉先在代扼其

北犯乃憑城固守而潛出兵奮擊連戰數日殺賊無算會食盡援絕退保寧武賊亦踵至復連戰殺賊萬餘人力盡城陷死之自成每語人曰他鎮復有一周總兵吾安得至此福王時贈太保謚忠武列祀旌忠祠

國朝

劉正字方若一字振之直隸任邱人順治初以選貢生授代州知州士有問業者親課讀不懈州人某爲仇家所訐禍不測力白其枉得釋懷數百金以

謝峻拒之姜逆變賊數萬攻城者百日正內戢外禦比敬謹親王至圍始解或指聚落爲賊黨抗聲折之密令具牛酒犒師胥獲免晉太原府同知領代州如故尋改商州知州以去

許可用蓋州人順治四年以弟子員任鴈平道慷慨饒謀畧姜瓖變州人劉遷應之衆數萬屯城下攻甚力可用督兵民捍禦而密遣人赴軍前請合勦遷遂授首圍獲解在任三年擢陝西關西道代人

立祠聶營村

張道祥江南徐州人康熙十三年以官生任鴈平道  
多惠政庚申代饑捐俸煮糜粥三所購米河東當  
山平價糶之全活甚衆又捐銀千七百兩修書院  
設義學在任十一年擢湖南按察使代人思之

楊聲遠奉天廣寧人康熙十三年由通政司筆帖式  
任代州知州操行清白暮夜罔欺郡士張懷公有  
贈句曰家傳三事訓心勒四知銘蓋紀實也

程憲奉天寧遠人廕生康熙十七年任代州知州溫  
恭廉正愷悌爲懷申匹歲饑分炊東郭日飽千餘

人時樂戶誘買良家女子甚多勒令自首歸還原  
主尤雅愛士類修文廟建儒學興廢舉墜殆無虛  
日秩滿陞戶部員外郎

李毓柱鑲紅旗人廕生康熙三十八年任鴈平使蒞  
官精敏丰采峻厲具發奸摘伏之才豪強歛跡奸  
宄潛踪雅重文學創建義學延師教讀多所成就  
陞直隸巡道

謝王寵陝西寧夏人雍正元年由翰林授鴈平道下  
車後卽以察吏安民興學善俗爲首務分巡所至

直隸代州志 卷之四  
雖飲食供給不取之下吏嚴察屬僚毫無瞻徇書  
院延師課士每會期必親詣講堂與諸生論說文  
章道義教民以孝弟爲先勤儉爲本嚴保甲黜淫  
祀戒浮華禁佛事一時吏治肅清士習端方民知  
禮義俗尙醇朴去之日士民感泣遮道攀轅而送  
者絡繹不絕累官至都察院左都御史

高遐年浙江會稽人雍正元年任代州知州嚴明清  
正克愼克勤人稱循吏其時謝公王寵爲鴈平道  
相得益彰云

湯豫誠河南儀封人由進士游歷冀寧道雍正六年  
調任鴈平道清操特立悃愾無華繼謝公王寵後  
肅吏治端士習厚民風一切由舊惟惡惡尤嚴常  
曰惡人不除良善不安姑息養奸弗爲也故其丰  
采爲特峻云

楊宏志奉天鑲紅旗人雍正六年授代州知州爲政  
多存大體下車後卽建節孝忠義祠每歲早步禱  
勾注陘神卽雨時人有活龍王之稱性至孝嘗遵  
母命薄罰減刑人皆感激犯罪者亦少其親民堂

手書對聯云頭上是青天若有一點私心便恐雷  
霆迅擊眼前皆赤子卽存十分公道還羞父母虛  
稱

黃祐字啟彬號素堂江西新城人由翰林擢御史乾  
隆十一年任鴈平道勤以蒞政廉以率屬恭儉持  
已慈惠御民尤以作養人才爲首務後調任冀寧  
道提調鄉闈一切號舍薪水罔不周備三晉人士  
到今稱之

考名宦祠如霍去病未嘗出鴈門杜延年守西河

楊延昭知保州舊志謂祀亦可刪是矣若鄭昌之  
列祀已久特行誼無所表見無緣立傳所謂傳者  
不必祀祀者不必傳固可互見云爾

鄉賢

漢

王霸新莽篡漢時霸謂已漢舊民也恥事新莽遂棄  
冠帶絕交宦建武初徵至拜尙書稱名不稱臣尋  
稱疾歸茅屋蓬戶率妻子躬耕以卒歲屢徵不起  
周黨家產累數千金散於宗族游學長安建武初三

徵乃就車陛見帝伏而不謁自陳願守所志帝不能屈乃曰太原周黨不食朕祿詔賜帛四十疋罷歸遂隱居澠池

殷謨字君長王莽世與周黨胥守節不仕建武中徵不至

范隆孕十五月而生時父適亡又四歲母亡悲哭哀恸感動行道後長劉元海舉爲大鴻臚秉直自守

前宋

周續之年十二徙豫章詣太守范甯受學居數歲通五經五緯號曰十經爲同門諸生之冠旣而入廬山與劉遺民陶淵明俱不應辟命稱潯陽三隱

南齊

解叔謙母疾危謙旦夕禱祈愈母疾至夜聞空中語云須丁公藤爲酒謙訪至宜都山見老翁伐木謙問何木翁曰丁公藤謙拜求木而歸漬酒飲母疾果瘥

北魏

李栗辨捷多技能習將畧數有戰功道武朝拜左將軍

唐

茹汝昇長安間為僕射本郡峩峪水泛溢汝昇理泉脉俾水就道仍穿渠引水教民灌溉里人至今賴之峩峪口胥建祠春秋祭享

五代

史儼以騎射給事武皇為帳中將驍勇絕眾善設伏

望塵揣敵所向皆捷

按鄉賢祠有李儼通志係史儼恐字畫之誤

李承嗣從武皇討賊關輔為前鋒攻華陰擒黃巢使

王沂以獻朱玫亂承嗣率兵援鄜州至渭橋迎駕

玫既殺入京師承嗣又率兵攻岐人追至趙城合

大軍攻平陽三日而拔

郭崇韜明敏有才幹事唐莊宗初為中門使尋拜兵

部尙書樞密使佐莊宗滅梁平定天下賜鐵券拜

侍中成德軍節度使依前樞密使莊宗與諸將以

兵取天下而崇韜未嘗居戰陣徒以謀議居佐命

第一功位兼將相遂以天下為已任遇事無所回



避時宦官伶人用事崇韜多裁抑之以故羣小側  
目後副魏王繼岌平蜀莊宗遣宦官何延嗣勞軍  
崇韜不郊迎延嗣大怒因與監軍李從襲等共搆  
之誣崇韜有異志莊宗遣宦官馬彥珪至蜀視崇  
韜去就彥珪以告劉皇后劉皇后教彥珪矯詔魏  
王即軍中殺之

史建唐

通志作塘

父敬思仕晉為九府都督常將騎兵為

先鋒晉王東追黃巢還過上源驛梁兵夜圍敬思  
登驛樓射殺梁兵十餘人晉王總尉氏門出敬思

為梁追兵所得見殺建唐少為裨校自晉拒潞州  
已為晉兵先鋒梁兵數為建唐所殺相戒當避史  
先鋒以功加檢校左僕射嘗以五百騎擊走梁太  
祖兵數萬累以功歷貝相二州刺史子匡翰沉毅  
有謀好讀書禮下愛眾歷懷和二州刺史鄭州防  
禦使義成軍節度使兵民愛之

扈彥珂仕晉為河東節度左都押衙漢初擢宣徽南  
院使尋授鎮國軍節度華商等州觀察處置使乾  
祐初周祖總兵征三叛道出華州時議多以先討

王景崇趙思綰為便周祖意未決彥珂曰三叛連  
橫推李守貞為主宜先擊河中河中平則永興鳳  
翔失勢矣今舍近圖遠若景崇思綰逆戰於前守  
貞兵其後腹背受敵為之奈何及平河中以功遷  
護國軍節度加同平章事後以太子太師致仕

宋

何行宣慕赤松子之學不家居四游方外子子奇秉  
義郎宣寧尉子林忠翊郎守豐州俱歿王事子奇  
子宏中幼以奇節自負宣和末敵擾江左宏中決

策破之授河東北兩路統制接應使使金不屈名  
益著尤長詩文

金

劉復為國子祭酒上輕車都尉通志作上卿都尉以文章知

名當世卒謚文靖號雪溪今其墓存

禹顯貞祐初隸上黨公張開累以戰功授義勝軍節

度使兼沁州招撫副使元光二年元攻河東顯扼

龍舟谷破其軍擒元帥韓光國獲其輜重甲仗甚

多追至祁縣而還所歷州縣悉復之顯將兵二百

守襄垣元將集河朔步騎數千攻之數四不能拔  
既而戰於玉女寨又大捷開言於朝權元帥府都  
監正大六年十一月軍內變城破被執死之

元

許蛻工詩有河東集尤以武皇廟酒渴等篇為世所  
傳頌與張韶李忠蘇吉李鵬翼等俱以詩名

倪民望亦工詩屏山稱曰倪侯頭如筆其鋒不可當  
世嘗稱其種松等詩子仲儀亦有能詩聲然與許  
蛻稿俱不傳

司良輔舉至正丙子鄉試除學正辭不就家居教授  
程朱之書始布北方尊信者尚少良輔諄諄開示  
領畧者衆

明

弋謙永樂九年進士除監察御史出按江西言事忤  
旨貶峽山知縣復坐事免仁宗素知謙骨鯁召為  
大理寺少卿直陳時政多見納既復言五事太激  
上不懌尚書呂震等因劾謙誣罔都御史劉觀令  
衆御史合糾謙楊士奇曰謙不諳大體然心感超

擢恩欲圖報耳主聖則臣直惟陛下優容之上乃  
不罪謙時中官採木四川貪橫召謙諭曰爾清鯁  
爲朕往治之擢副都御史賜鈔以行遂罷採木之  
役宣德初爲交趾右布政使王通棄交趾謙亦論  
罪正統初釋之土木之變謙布衣赴闕下薦通及  
甯懋阮遷等十三人皆竒才可用不報景泰二年  
復至京疏薦通等于謙奏錄通等命弋謙代臣總  
軍務不許罷歸卒

趙文博景泰甲戌進士任御史天順時同張鵬楊瑄

等劾石亨曹吉祥下詔獄并逮治都御史耿九疇

大學士李賢是夜雷電大作雨雹如注翌日得赦

出瑄鵬謫戍鐵嶺文博貶淳化知縣有善政憲宗

初擢衛輝知府累遷右副都御史巡撫河南卒

崔震成化間明經爲人厚重通敏授山東泰安州判

官恪恭供職愛民如子去後民猶思之

王鑰舉天順己卯鄉試授開封府訓導期年解組西

還教授生徒郡中明經之士多其弟子晚年益工

詩好游每跨蹇攜升米壺酒任所至遇山水佳處

則命酒採蔬煮粟而食足跡遍境內其題詠有鴈門勝跡稿

馬驥成化庚子亞元性謹厚力學敦行鄉里敬服士類推崇官海寧州同興除利弊政尚寬平民以良佐稱之

孫鳳成化間人精術藝而性淳厚有古人風視聶營地知下有泉教居人疏鑿溉田近萬畝家中獲竊兒識其面遣而去之至老死不傳其姓名常曰吾少不讀書而多技能可恥也有女不媒富貴膏梁

子竟選貧生陳臯謨者爲壻且教臯謨與其子岐旦夕攻章句後岐舉於鄉臯謨舉進士

趙清成化癸卯舉人授齊河知縣時邑之洪店有盜殺人於民人王臻舍側衆誣執臻臻不勝撈掠認服清適勘事過洪店一牛奔向清跪而悲鳴若有所訴問之則臻牛也清曰臻其冤乎抵邑卽辨釋臻然殺人者未得衆猶疑後鞫大盜王山廉得其實山歎服曰殺人於王臻舍側者山也齊河人稱

神明作青牛記

劉繹字以成宏治丙辰進士授戶部主事遷郎中督理遼東糧儲正德中以不肯賄瑾瑾怒械至京師以大枷枷之同鄉有王菴者侍左右晝夜不離月餘得不死時稱劉鐵漢家宰張爲言於瑾罷爲民後瑾敗起監察御史遷衛輝知府值賊劉六等剽掠豫中竭力守禦遷長蘆鹽運司運使致仕歸

孫璽字廷信宏治己酉舉於鄉連知諸城扶風縣正德六年都御史藍章以畧陽漢中要地舊無城而其命嚴順懦不足任檄璽往城之七年正月功未

畢而川賊至順欲去璽拔刀砍坐几曰欲去者視此乃率僚屬堅守數日城陷璽被執不屈賊斃殺之順逃去誣璽俱逃溺於江以他人屍斂子啟視非是訟於朝勘得死節狀贈光祿少卿賜祭予蔭抵順罪

謝璽寧波推官鐸之子宏治庚戌進士授容城知縣多惠政去任後民猶思之歷按察司僉事以破萬山寇功賜金帛家居爲人廉靜子國表進士國詔國徵舉人表之子芝蒲詔之子蘭俱進士

孫紹先宏治間領鄉試第一舉進士選庶常母卒廬墓三年後以檢討歸卒人爭悼之詩古文雅爲時所推

陳臯謨正德辛未進士知三河無錫二縣俱有惠政召拜工科給事中劾席尙書再劾郭武定侯直聲震朝右尋告歸不再出家徒四壁立平居篤孝友重節槩鄉評重之

間仲字

間通志作閻誤

字仲夫正德癸酉舉人授華陰知縣

以卓異起部郎抗權貴謫州同陞同州知州剔弊

舉廢數月而治巨盜劉漢聚衆劫掠前吏不敢問仲宇逮治將具獄盜大言曰吾家累千金豈爲盜者意以陰動仲宇立撲殺之民喜形於謠守同三年失當道權坐構免歸卧敝廬襍被蕭然裹足公府死時幾不能治墓具同州大學士馬自強誌其墓誌載同州事甚悉且云同州人世祀之

張定正德己卯舉人初仕鄧州歷郎署太府遷都轉運使終貴州參政所至有惠政知馬湖時剖奢楊兩宣慰數十年不決之獄行時有土官以金銀器

正嘉州志 卷之四  
覆米麩饋定者定却之事母及大母俱以孝聞妻  
崔氏死不再娶而別室無妾媵兄弟八人友愛備  
至所入俸均給其兄弟故歷官大藩田園無所益  
於舊在鄧州馬湖府淮安兩浙俱祀名宦  
阿其麟嘉靖癸未進士授寧晉知縣三年以峭直罷  
歸閉戶擁圖史絕跡城市巡撫楊巍聞其賢訪之  
於廬再往始一見居蓬草無異編氓所著詩文備  
紀時事可當野史卒未幾而子孫貧甚稿亦散佚  
無存

王夢弼嘉靖乙未進士歷刑科都給事時楚世子獄  
具詔母覆奏卽行刑夢弼欲奏同列懼夢弼曰楚  
獄誠無寃但覆奏制也竟三覆奏尋晉都御史巡  
撫寧夏屢有戰功廕子進官後謝事歸卒賜祭墓  
楊恂字伯純萬歷癸未進士授行人擢刑科給事中  
錦衣冗員多至二千人請大加裁汰不用累遷戶  
科都給事中時征倭師多冒破帑金請嚴飭邊臣  
而劾武庫郎劉黃裳侵耗黃裳卒罷尋上節財四  
議格不行御史冀體極論首輔趙志臯貶三秩復



斥爲民恂論志臯並及張位語甚激切疏入忤旨  
以原品調陝西按察使經歷引疾歸久之吏部尙  
書蔡國珍起廢及恂未召卒

王大順字泉鳳萬歷十一年任河南永寧縣巡檢尋  
以親老歸養父虎早歿事母劉氏至孝母死哀毀  
骨立幾不欲生旣殯廬墓三年朝夕供奉若生時  
有孝思懿行一卷

孫傳庭

通志作傳庭今考明史及其家傳並題名碑額皆傳字通志誤

字伯雅號白

谷自父以上四世舉於鄉傳庭儀表願碩沉毅多

籌畧萬歷四十七年成進士初授永城知縣歷遷  
吏部稽勲郎中以逆璫用事告歸崇正八年起驗  
封郎中起遷順天府丞時秦寇方熾乃以傳庭巡  
撫陝西旣蒞秦毅然以平賊自任斬賊首整齊王  
於商雒降高迎祥等於黑水峪獻俘闕下拓養坤  
懼率其黨來降尋叛去追斬之擊賊惠登相於涇  
陽三原追馬進忠劉國能等十七部出關斬首千  
餘級降其渠一條龍斬賊聖世王瓦背一翅飛降  
鎮天王上山虎又殲白捍賊渠魁數人連敗賊大

天王等於寶雞斜谷間降其餘衆關南少靖會楊嗣昌入爲本兵條上方畧傳庭移書力爭嗣昌因切銜之兩奉詔進秩嗣昌抑弗奏十一年春坐失援削所加秩傳庭出扼商雒破賊大天王獲其二子遂降又破過天星等於楊家嶺黃龍山嗣復擊之於職田庄賊走寶雞取棧道中伏折而走隴州關山又中伏皆大敗之賊死無算過天星混天星並降又逐賊邠寧間獲其渠馬進忠馬光玉等設伏於潼關原逐賊入伏闖賊李自成僅以十八騎

潰圍遁關中羣盜悉平捷聞帝大喜命加傳庭部銜嗣昌仍格不奏是時惟河南賊羅汝才等如故傳庭連敗之於閩鄉靈寶山間賊窘甚緣與總理熊文燦意不合賊故終逸去移瞰商雒復與屬吏王文清等三擊三敗之會京師戒嚴召入衛嗣昌復搆之乃斥爲民繫獄三年文燦嗣昌相繼敗時李自成攻破河南勢益橫帝乃思傳庭言起兵部右侍郎命將禁旅援汴開封圍解賊殺陝督汪喬年卽命傳庭往代至則縛總兵賀人龍數而斬之

諸將洒然色動朝議趣傳庭出關傳庭言兵新募不堪用不聽傳庭不得已出師趨南陽設三伏以待賊戰於邲大破之後軍忽潰賊反兵乘之諸軍皆潰乃收兵入關益募勇士開屯田繕器械製火車三萬輛戰則驅之拒馬止則環以自衛計守潼關扼京師上游俟訓練既精期謀再舉朝議復時趣之明年五月命兼督河南四川軍尋進兵部尚書改稱督師經畧七省軍務賜劍趨戰傳庭不得已遂再出師次於汝州汝州爲都尉李養純復破

賊於寶豐斬偽州牧陳可新等時諸賊老營在宜縣遂擣唐縣破之殺其家口殆盡轉戰至邲縣擒偽果毅將軍謝君友砍賊坐纛自成幾獲復奔襄城大軍遂進逼襄城會天久兩道漕糧車不能前進攻破邲縣獲馬羸數百噉之雨七日夜不止後軍譁於汝州乃還軍迎糧留陳永福爲後拒前軍旣移後軍亂賊乘之遂敗官軍破潼關傳庭與監軍喬遷高躍馬橫刀大呼歿於陣

馮明期字闇若萬歷庚子亞元幼喪父哀毀如成人

事祖母及母以孝聞塾師李煥獨而瞽常周卹之  
既歿復厚殯焉贍亡友馮甲妻子終身無倦里中  
婚葬賴以濟者甚多卒有遺詩二卷

張令聞弟令名俱諸生素性狷潔言動輒稱聖賢人  
多以迂日之甲申二月李自成破晉陽遣僞將先  
入代二生謀率衆嬰城衆不應或勸之降兄弟並  
叱之曰明興二百餘年吾祖宗父母實戴履之縱  
不能得尺土寸兵效張巡許遠故事惟有一死以  
酬君父忍屈膝寇庭以求活耶遂相與儒服儒冠

入宣尼廟相對飲藥畢長吟曰勁草疾風知大節  
貞松寒歲識冰心遂卒賊聞之曰義士也相戒勿  
犯其家

國朝

馮亨期字五美以監生授鎮江府經歷幼喪父迨壯  
議析箸裁取十之三姜逆之亂州人劉遷謀襲城  
姦匪將爲內應亨期知之密白當事爲畫城守方  
畧賊夜至以有備不敢動既知謀出亨期集衆數  
萬設長圍而殺其猶子於城下亨期捐家貲募死

正崇仁州志 卷之四 四  
士乞援雲中三遣乃達城獲全嘗自維揚返聞有  
負官錢就繫者立解橐贈之無吝色

馮如京字秋水由恩貢授永平府灤州知州興利除  
弊勸善懲惡清驛累招流移課農桑興學校三年  
治成陞本府同知

國朝定鼎授永平知府尋陞陝西榆林副使兵備靖  
邊巨盜黃色俊逼靖邊城如京率標下數百人擊  
之破其巢而殲焉事聞

賜賚有加遷西寧參政適西河獯賊叛劫甘州院鎮皆

被害如京鼓勵士卒且戰且守三閱月賊不得逞  
事平陞爵一級遷浙江金衢嚴分守參政平巨寇  
翁大洋功陞江南右布政乙未冬

詔求直言疏崇理學謹兵權實京倉慎邊守四事廷論

躉之擢廣東左布政使督撫以卓異舉己亥覲

京師疏別荒稅以足徵輸禁雜派以供惟正嚴委署  
以肅官方移重鎮以清海氛四事切指粵事甚悉  
朝廷嘉之下部次第舉行歸粵至江南壽州念母夫  
人年高不便迎養乞致仕歸里承顏侍奉者十數

年及歿哀毀骨立服闋未幾而卒年六十八歲

賜祭墓所著有秋水集春秋大成聖賢正諦等書行世

馮右京字左之順治四年進士由翰林改授御史糾  
戶部尙書某直聲震朝右巡按山東時巨寇周魁  
軒轉掠十餘郡官兵莫能治一日率衆窺長清巡  
撫他出右京命將出不意擊斬之并擒夥賊焦二  
青王俊等餘黨悉平康熙初授湖廣荆西道楚故  
澤國潛沔景陵間水患尤劇右京相地形穿渠三  
百里分殺水勢民慶安瀾建懷德碑以紀其事後

以病歸卒於家

馮雲驥字訥生順治乙未進士就大同教授遷園子  
監博士再遷戶部主事員外郎轉郎中出爲提學  
僉事雲驥籍華貫不習爲純袴態奮跡詩書以早  
年決科第而勤修職業不蘄躡進所至以廉明著  
尙書魏敏果公嘗言訥生見識高議論正稱爲畏  
友先是任學博時與雲中徐化溥遊梓其集行於  
世敏果公尤極稱之

馮雲驥字懿生康熙丙辰進士選翰林院庶吉士授

編修充日講官起居注官歷禮科給事中雲驩嘗請假歸養父方伯如京母楊十餘年與兄叅議雲驥同居二十年雅好施賑待以舉火者百數十人典江南試號公明胡任輿陸肯堂黃夢麟梅庚汪薇皆其所得士也既歸時時指授後進如劉進士悻張孝廉嶼劉明經宅揆胥以文名

張綸世字卓菴性耿直好讀書詩古文辭皆超絕由副車選拔教習八旗多所成就總制常雋其一也知南豐縣治績皆卓異可紀矯發倉穀生全道謹

尤仁政之大者罷歸講學授徒經史自娛以終其身

馮鍾宿字垣拱年十七補諸生父慶曾初莅靈臺前令稽災多漏籍定不可增鍾宿鬻田助父賑乃徧後其父同知甘州鍾宿省父至甘會西陲用兵一切多所贊畫以家貲五千金奉父飲餉大吏聞之愛其才勸之仕遊京師以例選中書舍人聞父病卽乞假馳至安西父已歿扶柩歸哀慟感行路服闋以母老遂絕意仕進性好施與凡有周給無德

色教諸子以義方後子五人咸登科第

舊志謂生存而賢弗遽傳死矣而議未定弗敢傳  
議定而遺佚其事無可傳此確論也今鄉賢祠有  
費穆者雖事佚而無可傳而其人豈遂湮沒云

宦績

漢

吾邱壽王字子贛少從董仲舒受春秋高才通明遷  
侍中中郎後爲光祿大夫侍中丞相公孫宏奏言  
禁民毋得挾弓弩壽王對大不便其說甚覈宏詘

服焉及汾陰得寶鼎羣臣皆賀得周鼎壽王獨曰  
非周鼎上詰之對曰天祚有德寶鼎自出此天之  
所以與漢乃漢寶非周寶也上曰善賜黃金十斤

隋

房兆剛毅有武畧開皇中爲邊將名顯當時嘗爲行  
軍總管以功官至柱國徐州總管

唐

渾瑊年十一善騎射隨父釋之防秋朔方立跳盪功  
後勇常冠軍戰輒克勝功最累遷邠寧慶副元帥



進檢校司徒兼中書令卒贈太師謚曰忠武瑋天性忠勤功高而志益下歲時貢奉必躬閱視每有賜下拜跪受常若在御前世方之金日磾故上終始信待有所奏論不盡從可輒私喜曰上不疑我故治蒲十六年常持軍猜問不能入君子賢之

五代

李嗣本本姓張氏世爲銅冶鎮將少事後唐太祖愛之賜姓名養爲子從擊居庸關以功遷義兒軍使從破王行瑜遷威遠軍使從攻羅宏信以先鋒兵

破湯陰從莊宗破潞州夾城累以戰功遷代州刺史雲州防禦使振武節度使天祐十三年從莊宗擊劉鄩於故元城下洛礮諸州六月還軍振武契丹入代北嗣本戰歿

李存進本姓孫名重進晉王賜姓名爲養子從破黃巢莊宗時遷行營都虞侯礮沁二州刺史後代李嗣昭爲招討使與張文禮子處求戰歿於陣追贈太尉

張敬達字志通小字生鐵少以騎射爲廳直軍使明

直隸州志卷之四  
宗時累遷至大同彰國振武威塞等軍蕃漢馬步  
軍都部署石敬瑭拒命以敬達爲太原四面招討  
使遼太宗自鴈門入援敬瑭敬達兵爲遼師敗於  
汾曲死者萬餘人敬達收軍柵晉安遼師圍之周  
回百餘里唐遣趙延壽范延光等來救皆不敢進  
副招討楊光遠勸降敬達不忍背唐光遠促之不  
已敬達曰諸公何相迫耶何不殺我而降光遠卽  
斬敬達降遼太宗哀其忠遣人收葬之

金

李師雄字伯威有材力喜談兵慕古之英雄故名師  
雄宋宣和中以騎射登科官大名清平尉金師至  
出降皇統二年爲武勝軍節度使正隆末爲河州  
防禦使後從元帥左監軍徒單合喜攻河州有功  
未幾疾卒

楊閏少孤鞠姊夫禹顯家後上黨公張開令顯以綿  
上招撫使守襄垣閏從之晝止敵驅夜斫營壘凡  
戰禦事不以勞顯力戰五年敵引去不敢逼授懷  
遠大將軍同知沁南軍節度使事尋行銅鞮令行

夜至隘樓止宿其上中敵偵刺未殊猶張空拳搏  
數人乃仆年二十九明年顯亦斃開不能獨守上  
黨遂走汴

明

崔元尚憲宗女永康公主世宗入繼以迎立功封京  
山侯給誥券諭禮部曰永樂初年太宗入繼大統  
駙馬都尉王寧以翊戴功進封永春侯非無故事  
也已坐張延齡事下詔獄尋釋元好友文士有譽  
於時寵幸優渥勛臣戚畹莫敢望焉卒贈左柱國

太傅兼太子太傅謚榮恭

張檄成化癸卯舉人歷官陝西副使環慶兵備識明  
量宏於兵食計尤練又強記過人接於目者終身  
不忘在慶三年人以安靜稱之

孫紹祖字我山檢討紹先弟也正德辛未進士選翰  
林庶吉士授編修嘉靖初纂修武宗實錄賜銀幣  
衣服特厚晉右春坊右中允充經筵講官紹祖長  
身偉儀觀孝友特至在庶常以叔璽官扶風築城  
畧陽遇賊力戰死畧陽官吏匿不以聞與兄力為

申理得祭墓贈卹如例及蒞編修兄卒於里疏請  
 歸葬時一子方殤妻劉以哭子垂斃畧不少顧星  
 夜馳至家扶柩慟哭既葬奉母張如都侍養後母  
 誕日庭下產瑞草一本生平博極羣書詩文超軼  
 尤工書法卒年四十二

謝蘭字與德嘉靖丙戌進士授正定府推官奉委踏  
 南宮寧晉兩邑皇莊主者欲益賦蘭以地瘠多水  
 患力與爭退曰吾寧獲罪上官不忍貽害小民也  
 擢監察御史按遼左再按浙江游歷右副都御史

巡撫陝西秦隴饑黠者嘯聚山野間肆剽掠蘭為  
 請帑金賑饑復大陳兵威又遣檄諭之斬渠魁數  
 人餘黨解散事聞晉秩二品賜金幣有差督臣議  
 復東勝蘭力持不可事得寢尋入為兵部侍郎致  
 仕歸卒年七十九歲

吳嘉會字惟禮別號南里其先楚人國初從太祖北  
 征屯代遂為代人嘉靖甲午書魁乙未進士授行  
 人陞刑部主事辨壩上盜有聲郎署間擢山東僉  
 憲賑饑築堤禦寇詔賜金帛轉本省藩叅單縣妖

人楊惠等倡亂官兵攻之不克單車詣壘諭之衆  
悉解散縛渠兇數十人磔諸市東土以寧遷陝西  
叅政未行拜都察院右僉都御史整飭薊鎮邊務  
在鎮日夜庀戰守具起居庸盡山海關剏修石垣  
四萬丈甃敵臺烽堠二千六百有奇分其地爲十  
區區設游叅兩將軍分統健卒合之凡二萬人怒  
馬堅甲長戟利鍛於時薊鎮稱虎豹九關天下隘  
云鎮薊七年匹馬不得入塞肅宗褒賚甚優屢晉  
貳本兵因爲相嵩所忌罷歸卒年七十七穆宗遣

官諭祭葬如卿臣禮著有奏議十卷

吳嘉聰字惟德正德辛未進士授豐城令土賊嘯聚  
瑞州勢甚猖獗嘉聰督大兵勦平之賜金幣擢守  
曹州黃河決築防有功擢刑部員外郎會江西逆  
變初靖以嘉聰爲南昌守宸濠逆狀久未上嘉聰  
援筆頃刻而定勅擇宗裔可繼藩祀者嘉聰首推  
弋陽王與情允服江堤大圯嘉聰悉力規計旬日  
告成至今名爲吳家塘擢山東按察司副使兵備  
徐揚卒年六十六歲

張鳳翼字九苞萬歷癸丑進士穎異好學讀書十行俱下過目輒不忘詩文皆卓然名世以廷試第五人授戶部主事有邊材歷陞右都御史總督薊遼保定軍務崇正三年以功進太子少保兵部尙書廕錦衣指揮僉事時西協單弱鳳翼疏陳增良將宿重兵備火器預軍儲遠哨探數事尋以宣大兵寡餉缺上言乞兩鎮各增募萬人以一人食二餉皆從之七年功加太子太保闖賊南犯推盧象升爲總理上言防河扼險爲目前勦賊要策上稱善

命速行之因自請督師討賊不久九年賜尙方劍盡督諸鎮勤王兵治軍書不休尋卒奪官十一年論前功詔叙復

陳玉本籍江南江都人曾祖桂以軍功得世襲振武衛指揮使遂家於代父祥正由指揮使僉事陞授瀋陽營游擊玉襲父職萬歷四十六年奉調援遼四十七年四月力戰歿於陣詔加贈卹

有何印者衛指揮使

同時死節

馬珍因避諱更名琰號聘韋萬歷己酉舉人嗜春秋

善左筆遇事敢爲由成安知縣遷陝西慶陽府同知適邊寇至琰誓衆曰一生建豎在此爾衆勗哉於是設伏制勝斬馘甚多以首功上廕子之良爲振武衛指揮僉事內轉刑部郎中奉勅恤錄四川讞決平反稱明允焉擢臨鞏兵備道值流寇騷亂饑饉荐臻琰恩威並用一時危疆倚爲長城尋遷固原參政贊畫尤多撫臺練奇其才欲舉以自代疏已具忽遘疾卒

楊鼎樞字斗衡萬曆己未進士博極羣書著述甚富

初知嵩縣有德政民立生祠內轉兵部車駕司主事歷員外郎中尋擢雲南布政司參議分守臨元所至以廉幹著績子潤芳尙晉府郡主貴而不驕人稱厚德

崔賢天啟甲子舉人少負奇氣讀書以忠義自許知新河縣卓有賢聲崇正九年七月兵難知力不能支仰天嘆曰吾爲京山侯後世受國恩未酬萬一今當以死報之城陷不屈死

國朝

馮配京爲人伉爽多材善騎射以武功授小石口把  
總姜逆之變代人劉遷聚衆以應配京與戈節共  
守水峪堡賊至率堡兵與戰連却之賊益發兵圍  
之百方攻擊數日堡陷被執逼呼代城降許以富  
貴配京佯應之至則大呼守陴者曰賊衆烏合無  
能爲諸君其悉力守天兵且至毋以我故懷二心  
賊怒殺之戈節亦不屈死賊平大吏聞於  
朝加贈卹焉

王應虎字甫山膽力過人能騎射善舞大刀靖藩梗

化慨然從戎輒樹績康熙十四年征勦海逆身先  
士卒所向克捷恢海澄復澎湖招撫臺灣累功陞  
浙江總兵世襲拖沙喇哈番尋遷福建漢軍副都  
統

賜賚甚優廕一子入監子邦寧屢著勞績亦歷陞廣東  
高州鎮總兵共推名將卒俱

諭賜祭墓

馮元方字伯直雍正甲辰進士初授直隸隆平知縣  
歷官至廣西南韶連參政道所至廉幹有聲雍正



十三年貴州苗叛調廣東兵會勦以元方監絕軍事贊畫胥中要害其勦滾縱勞績尤著滾縱者逆苗魁也尤克黠陽投誠而陰實偵伺元方令於衆曰釋此苗不誅則諸苗不懼過此時不勦則後勦無名乃勒兵嚴鼓破滅之於是古州苗悉降古州既平請以止殺善後宣布

皇仁爲急執政躉之尋擢廣西按察使

馮光裕字叔益康熙辛卯舉人初任雲南大姚知縣累官至湖南巡撫精敏強幹熟於經世之務自令

長至秉節鉞任苗疆者十餘年所至廉潔自持遇事有爲其初由知縣擢銅仁府同知引

見時會朝議取古州苗

世宗憲皇帝詢苗疆情形光裕敷陳剴切謂愚苗無知不宜盡殺當隨機化導令歸版圖

上嘉納之爲貴州布政使討平古州苗復請蠲額征以

甦民困招徠流亡給之衣食俾難民復業後巡撫湖南適鎮筸紅苗亂集兵請勦不三月大克之兵未罷而卒遺表惟請蠲城緩兩縣租賦無一言及

於私

上悼惜之賜祭葬

馮祖悅字鍾冀雍正甲辰進士由戶部員外郎出知陝西甘州府擢洮岷兵備道以事左遷歷官廣東雷州府知府卒官雷州時遂溪民韋甲爲仇家誣以奸殺事巡道某力主之獄已具祖悅審得其情惻然曰典郡之謂何顧可殺無辜以媚上官哉卒改其讞歷官三十年爲政務持大體不尙煩苛清操自勵不名一錢死之日囊無餘貲子鄧郝邵皆

工詩文郵尤知名

馮章宿字闇臣少從父宦遊於秦明習吏事遂以例選授安州知州州鄰新安豬龍河環其境河水汨田界兩地民訟數十年不決章宿覽形勢彙冊籍稽四至疆界畫然民皆大服遷霸州治河渠蓄泄有方民安其利歷順天府治中轉刑部員外郎議獄詳慎明允出知浙江嘉興府府稱繁劇號難治以廉能擢杭嘉湖道杭嘉瀕海章宿履勘塘工得其要領尖山石壩老鹽倉柴塘尤時刻殫心故終

其任民無風潮患至於各屬利病時爲體訪勞心案牘不減守牧以故積勞成病卒於官

黃泌由進士歷仕武寧浮梁二縣晉南昌同知卒於官泌品端行潔經術蘊含文名之著其餘事也任武寧時知茶榷病民捐俸免稅民藉以蘇甚德之浮梁一邑舊有銅婢不嫁厝柩不葬陋習請上立除遂使生無怨而死有歸澤之及人深矣倘天假之年夫豈可限哉然卽其一二展施殆亦不負所學者歟

篤行

陸印北魏時人歷官中書侍郎父喪哀毀骨立高澄時鎮鄴詣門慰勉之母爲上庸公主教諸子以義方印雖創巨痛深出於天性克遵母訓動依法度朝廷下詔褒美改所居爲孝終里繼遭母喪哀慕憔悴遂成風疾弟搏卧病臨終語家人曰兄羸病若此搏死不可使聞哭聲懼致感動及祖載家人方始告知印一慟而絕弟彥師亦以行檢稱叅襄城王旭軍事父艱去職殆不勝哀共印廬墓鄉人

重之率就墓側存問焉

王汝敬字敬夫早年寓雲南之蒙化教授生徒敦尚禮法蒙俗一變後回籍登正德甲戌榜進士名重晉陽時謂之山西王道學官行人亢直不容告歸養親克盡孝道親卒廬墓所雨雪凍死

魏登高父客遊患病載之以歸號泣走千里問視不懈父病尋愈

張三光諸生家極貧與妻宮氏竭力事親後旌表

王斐事親孝典衣供甘旨嘗遭水患負親出溺兒女

啼號不顧獲旌表

孫元震字起之大司馬傳庭父也幼聰穎年十五補諸生萬歷丁酉舉於鄉性至孝母任氏早逝哀毀骨立夢寐哽咽成聲覺則攀號達曙父嗣約以萬歷辛卯舉人知觀城縣素狷介罷官歸家徒四壁幾不能備菽水元震竭力承權洩如也後其父卒悲哀如喪母時竟以傷慟之過一疾不起年四十三卒

張令德字憲之代庠生令聞令名伯兄也闖賊遣僞

正宗... 卷之四  
將入代聞兩弟飲鴆於大成殿遂自縊適妹婿來  
解救之老母復奔泣曰爾皆覓死所耶如我何乃  
仰天嘆曰吾固不忍獨生而又安忍吾母之無所  
倚以生耶強起殯葬兩弟事母孝養益篤終身不  
復進取

麗泉順治時人學增生父早逝家極貧事母以孝聞  
母歿既葬構草舍於墓側僅容膝日就館課徒晚  
必省墓風雨寒暑無間三年如一日焉

趙全璧生六歲母亡父以家貧謀食於外全璧寄養

外氏傭工作苦家計粗足時盼父歸年二十五娶  
李氏日夜與妻計曰母早死父存亡未卜並不能  
盡一日之養生子何爲李曰何不四方尋之於是  
歷東口西口往返者二次畧無消息歸益憂思涕  
泣李曰涕泣何益終尋之可也乃矢志曰此行若  
不見父死亦無歸於是復出西口由東口歷熱河  
抵都下至宣府遍訪無踪奔走年餘貲糧告竭時  
乞食已數月矣偶至關帝廟見一老者聞其語鄉  
音也細加詢問則父也彼此相持痛哭廟僧感其

事贈以路貲扶負而歸

文學

元

薩都刺字天錫別號直齋本答失蠻氏祖父留鎮雲  
 代遂為鴈門人薩都刺猶言濟善也弱冠登泰定  
 丁卯進士第應奉翰林文字出為燕南經歷擢南  
 臺御史以彈劾權貴左遷鎮江錄事歷閩海廉訪  
 司知事進河北廉訪經歷卒于文傳薩天錫集序  
 天錫陟官閩憲幕往還吳中出所作鴈門集見示

其豪放若天風海濤魚龍出沒險勁如泰華雲開  
 蒼翠孤聳其剛健清麗則如淮陰出師百戰不折  
 而浴神凌波春華霽月之娟媚也

明

施重光字慶徵振武衛人讀書雙寨屯委質王文端  
 公中萬歷己卯舉人辛丑進士廷對時直陳時政  
 不避權貴後官至刑部郎中以剛直罷歸著述有  
 主臣言代州志賦徵唐詩選近體集行世

國朝

馮之京順治甲午拔貢幼慕河汾學於聖賢理道真  
知實踐習焉不察之中常發先儒所未發人皆稱  
白石先生兩司訓鐸崇尚實學院使者以當世大  
儒表其間擢樂安令有政聲著作不自收拾僅存  
偶拈臆解一卷

張瑜字懷公康熙甲子副榜生平規步矩行有澹臺  
氏之遺風文亦超拔絕俗教授生徒嚴明有法選  
授孝義教諭而卒著有雪崖文集可居詩草

劉憭字樸夫康熙庚辰進士天性嗜學讀醅醢墨而

食人戲炙其背不自覺文尚清肅多成就後學令  
長武請豁民逋賦數千辦西域軍需百姓不擾後  
民立祠祀之

苑林崑字兩峯康熙癸巳進士性敏好學雖病臥床  
褥枕畔一卷呶唔不輟文藝爲時所推令孝豐兩  
爲同考官所得俱知名士

施陽林字幼野生而聰穎讀書日記數千言未冠舉  
於鄉益肆力於經史爲文矯拔奇峭神肖古大家  
賦亦華贍可誦有論文三則學者奉爲準繩年五

十成進士未仕而卒

馮欽字過亭無書不讀博綜淹貫詩文自成一家尤工書法由舉人選內閣中書遷刑部主事致仕里居鍵戶著書有春秋比事喪禮溫故若干卷遭故散佚所存僅半學菴集三卷

馮允升字仲孚雍正癸卯進士天性孝友沉晦寡言文章冠絕一時捷南宮時侍郎黃叔琳謂其品學純粹舉授湖廣嘉禾縣令耿介不與俗緣未期年引疾歸教授子弟以古人爲法程任郝博雅工書

選入詞垣蜚聲藝苑允升訓誨之力居多云

陳錦華雍正乙卯歲貢舉壬子鄉飲性至孝生平惟以讀書爲事尤留心於聖賢正諦所著有文廟全書勸懲格言於先聖賢嘉言懿行多所蒐輯有功於學術人心不小

楊鎮字次岳雍正癸卯拔貢性沉靜多精識善誘後學一時名儒科第多出其門後司鐸芮城士風爲之丕振未幾卒於署

隱逸



荀恁字君大漢人少修清節資財千萬父越卒悉散  
與九族隱居山澤以求厥志光武徵以病不至永  
平初東平王蒼爲驃騎將軍辟而應焉及後朝會  
顯宗戲之曰先帝徵君不至驃騎辟君而來何也  
對曰先帝秉德以惠下故臣可不來驃騎執法  
以檢下故臣不敢不至後月餘罷歸卒於家

代淵字蘊之宋人唐末僑導江家世爲吏有陰德淵  
性簡潔事親孝受學於李暉張達舉進士甲科得  
清水主簿歎曰祿不及親何所爲耶還家教授坐

席常滿安撫使舉鳳州團練推官不就知益州楊  
日嚴又薦之遂以太子中允致仕謝絕諸生著周  
易指要老佛雜說數十篇晚年日菜食巾褐山水  
間自號虛一子

張本順號佑蒼明人性聰穎好讀書日以撰述爲娛  
所著有尙書輯要四子明道錄性理參微等集生  
平不樂仕進以鄉貢授訓導不就甘貧樂道澹如  
也大司馬張九苞勸令仕執手謝曰時不可爲強  
我以仕是速我病也倘假我數年讀書以老足矣

正德州志 卷之四  
九苞亦爲嘆服

劉靖民字汝舟崇正庚午舉人任河南府推官治獄明允有于定國之稱值闖賊亂歸隱滹水之陽國朝定鼎恭順侯吳維華撫晉過代趨之仕靖民自陳願守所志力辭不就遂隱遯終身

張祥鳳字子儀副貢瑜子爲郡諸生性狷介取與不苟慕赤松子學數遊五臺晚年貧甚日以詩文自娛後遯去妻子莫知所之或曰隱於華山

仙釋

劉鉉英號海蟾子燕廣陵人明經擢第仕燕爲相雅喜性命之學一日道士來謁待以賓禮問姓名不對自稱正陽子海蟾師事之道士授以丹訣海蟾棄官易服從之後隱代州之鳳凰山遊歷名山所至多遺跡丹成尸解有白氣自頂門出化鶴去元至正六年詔贈明悟宏道真君

闕道寧宋人號休休子幼爲釋已而學道養真於鳳凰山之來儀觀年八十四尸解有遺頌并誌今刻落

劉偉關中進士以御史出守楚郡一日忽尸解去家人以爲死矣嘉靖間賣藥於代病者求藥隨以丸應無不立瘳又善相人言未來事輒奇中代感傳爲劉鬍子然實不知爲何許人會有商人過一見愕然曰此吾恩人劉太守也劉始佯爲不喻商人諦視長跪再拜曰某以某事繫獄中賴公平反得釋劉度不可隱乃曰吾已出家矣戒令勿言翌日遁去越數載復有人遇之於金陵後不知所終仙曇鸞大師東魏時人年十四游五臺金剛窟見異徵

遂落髮註大集經未就而危疾作嘆曰身如朝露安所謂法身聞江南陶先生有仙方渡江求得之徒步謁梁武帝於重雲殿立談傾萬衆後見三藏菩提流支乃舍陶先生方而修西方十六觀久之天樂西來異香滿室師隱几卽化去魏武異之目曰神鸞爲碑紀述其事

解脫和尚隋邢氏子卅歲於臺山昭果寺披剃從抱腹山志昭禪師參學昭甚器之尋返昭果晝誦大乘夜則禪觀嘗於東臺麓見草衣比丘跏趺石上

卽前叩首比丘指金蓮花解脫顧之卽失比丘久之復現半身語曰夫解脫者當求諸己而由人乎於是狂機頓歇深契大法普度垂五十餘年後莫知所終

福運唐總因寺僧身嬰重疾長年不差因人清涼忘軀行道一日金剛窟前禮懺因而假寐見人以水沃之遂通宿命知往世爲法師貪他供養不淨說法墮牛犬中償足復人旣見是已劇增悲痛乃服香百日願焚身供養以懺宿愆積薪如山跏趺其

上火燄旣發五竅流光上燭霄漢

真寶宋人爲五臺山僧正學佛能外死生靖康兵起率其徒習武事於山中欽宗召對便殿眷賚隆縉真寶還山益聚兵助討州不守金兵大至晝夜拒之力不敵寺舍盡焚帥下令生致真寶至則抗詞無撓帥不忍殺使郡守劉駒誘勸百方終不顧且曰吾法中有口回罪吾旣許宋皇帝以死豈可二吾言金竟殺寶寶怡然就戮

成覺宋張氏子幼依善住院和希大德受業希受僧

統加號慈懿大師住清涼寺覺從諮決法要服勤  
三載希知其法器勉令叅方覺聞明教嵩和尚名  
卽往依焉朝夕諮決所疑廓然有得辭歸五臺嵩  
曰吾道北矣至山學者益衆壽逾八十而化

釋

流寓

番吾君趙人趙烈侯謂公仲連賜歌者田公仲稱疾  
不朝番吾君自代來謂公仲曰君實好善而未知  
所持今公仲相趙於今四年亦有進士乎公仲曰  
未也番吾君曰牛畜苟欣徐越皆可公仲乃進三

人

婁敬齊人也勸高帝都關中留侯亦言入關便上卽  
日之長安曰本言都關中者婁敬其賜姓劉號奉  
春君後上自晉陽欲擊匈奴使者十輩來皆言易  
擊上使敬往還報曰兩國相攻宜矜誇見所長今  
往徒見羸齒老弱必伏竒兵以爭利臣愚以爲未  
可擊是時兵踰勾注者已三十萬上怒罵曰齊虜  
以口舌得官廼敢妄言以沮吾軍械繫敬廣武遂  
往平城圍白登者七日解歸赦敬曰吾悔不用公

言封敬二千戶號建信侯

蘇威字無畏京兆武功人綽之子也周封懷道縣公  
隋初封邳國公爲納言上幸并州追詣行在所使  
決民訟大業初復拜納言進封房公從幸鴈門爲  
突厥所圍上欲輕騎潰圍出威諫曰城守則我有  
餘力輕騎則彼之所長萬乘何宜輕脫乃止突厥  
俄亦解圍去駕至太原諫速還京師爲根本計後  
坐事除名唐武德初卒

許善心字務本高陽北新城人初在陳舉秀才對策  
高第入隋續成父亨所撰梁史行世大業十一年  
從幸鴈門爲突厥所圍攝左親衛武賁郎將領江  
南士宿衛殿省以勲授通議大夫後於江都爲宇  
文化及所害越王贈左光祿大夫高陽縣公謚曰  
文節

魏先生宋人也逸其名字於書無所不博隋初太常  
議樂如聚訟先生至調律度而金石絲竹各得其  
所太常欲薦而官之先生不可受帛二百段而歸  
寓鴈門以帛市酒旦夕歡飲時李密敗黎陽亡命

匿鴈門先生一見而戲之曰子氣沮而目亂心搖而語偷方今捕蒲山黨得非長者乎密驚起曰旣知我能免我否先生曰子非帝王規模又非將帥材畧吾望氣晉汾有異人出能往事之當不失富貴密終不能用其言而敗而先生亦竟不知所往許將字冲元福州閩人舉進士第一熙寧中知制誥遼以兵二十萬歷代州境遣使請代地歲聘之使不敢行以命將將入對曰臣備位侍從朝廷大議不容不知萬一北人言及代州事不有以折之則

傷國體遂命將詣樞密院閱文書至北境居人踳屋棟聚觀曰看南朝狀元及肄射將先破的遼使蕭禧館客禧果以代州爲問將隨問隨答禧又曰界渠未定顧和好體重吾且往大國分畫矣將曰此事申飭邊臣豈不可何以使爲禧慚不能對歸報上善之以將直學士院後進門下侍郎卒謚文定

張宗誨字習之司空齊賢第二子少喜學兵法陰陽象緯之書無不通究齊賢守代州嘗與計畫遂有

土墜砦繁峙之捷以父任正字後守鄜州劉平敗  
嚴斥候籍入而禁出使老幼併力守禦之敵引去  
以秘書監致仕子請如賀秘監羽衣宗誨曰吾作  
白頭老監秘書而眠何以賀老流沙之服爲哉時  
以爲名言

滕茂實錢塘人靖康初以工部侍郎使金金留不遣  
茂實兄禔先降敵判代故粘罕遷茂實於代仍自  
京師召其弟華實來旦夕諭茂實易服茂實不從  
自製哀辭并篆九字墓額曰宋工部侍郎滕茂實

墓裹以奉使黃幡密授其友二聖北狩去茂實號  
泣請從金不許遂以憂懣卒友人董誥如所托而  
樹九字表於其墓入祀忠孝祠

明

李文忠字思本盱眙人洪武二年命會攻慶陽師次  
太原聞大同圍急曰兵可無西也遂出鴈門大破  
北師拜左副將軍封曹國公六年行山西邊留屯  
代縣七年出白登秋進師豐州擒故官十二人獲  
馬駝牛羊甚衆窮追至百千兒乃還卒追封岐王



謚武靖

吳廷舉字獻臣嘉魚人成化末舉進士繇順德知縣累遷廣東副使發總鎮中官潘忠二十罪忠亦訐廷舉逮繫詔獄劉瑾矯詔枷吏部前十餘日幾死弟舉人廷弼輒卧其枷下刑部主事宿進曰兩人死我何生奏記張綵乃得釋謫戍鴈門旋赦免累遷南京工部尚書致仕卒隆慶中追謚清惠

趙南星字夢白高邑人繇考功郎中累遷吏部尚書山西缺巡撫河南布政使郭尚友求之南星以太

常卿謝應祥有清望首列以請旣得旨而御史陳九疇受魏忠賢魏廣徵指攻吏科都給事中魏大中文選郎夏嘉遇南星極言應祥以人望推舉大中嘉遇無私忠賢矯旨責南星等朋謀結黨放歸張訥石三畏再劾之謫戍代州嫡母馮氏生母李氏並哀慟而卒子生三齡怖死南星抵戍所處之怡然莊烈帝初詔赦還忠賢黨巡撫牟志夔故遲遣之竟卒於戍所璫敗追贈太子太保謚忠毅

國朝

王席民字安生夷陵州人少補州學生後隸榆林趙氏籍中趙移官代州叅將引席民自助席民負氣概工詩布政司參議清苑陳公尤契之卒葬代州城南演武場右陳公首賦詩以輓富平李因篤立傳秀水朱燮尊志其墓

李因篤字天生陝西富平人博學工詩文蘭州王刺史綬嘗刊其秋興詩沉雄蒼鬱騷壇胥推伏焉文亦瞻整有體格後舉博學鴻儒官翰林院檢討秀水曹司農溶觀察三晉因篤以故人子從因善馮

觀察雲驥雅愛其風土人物居勾注夏屋間十年

耆善

高智甫明洪武間人夜獲偷兒與粟遣之人稱盛德馮盛成化時人家甚貧早起拾金一橐真諸篋密訪遺金者踰年始至盛詳加詢問物色皆符因啟篋畀之原數二百毫釐不爽客願解半酌之固却不受厥後子孫顯貴累葉簪纓人以爲厚德之報云喬應虎萬歷時人安敦和厚有長者風嘗畊於野遇土寇耨鋤自若其帥異而敬之戒勿驚年及邁任

貧甚謂其二子曰侄猶子也可異視乎家業乃三  
畚分之

閻仕俊崇正時人南門外滹沱橋初僅一綫不任車  
馬兵憲張公惟誠始創為輿梁至崇正時傾圮仕  
俊自捐百金并遠近募化重加修理車馬復得通  
行人皆便之

侯一位崇正時諸生輕財好義里內有不能完糧者  
多為代納里人感之

黃毓松康熙時人天性孝友遇貧親族多收養於家

有盜竄其產佔耕其地者皆置不校同村貧民竊  
其物為他人所發送還之不認後子甲舉於鄉咸  
稱為善之報

郎大士為老營所訓導告歸樂善好施於聶營村北  
捐金建橋並茶亭三楹嘗遇竊穀者佯為不知夜  
獲偷兒戒勿舉火縱之去旦發粟召里中貧者遍  
為給賜偷兒與焉蓋周其貧並晦其跡云

賈成玉敦厚好施圮塔河人皆病涉捐金三百餘建  
橋並茶亭一楹更施地十三畝為護橋設茶計客

邱失金七百餘隱而不言道憲湯訪得其事飭屬  
嚴究且故詰以諱失對曰失銀事小累衆事大願  
甘罪湯深嘆以爲義云

黃秉銓有潔癖毫而好學試輒高等學使者重其文  
品嘗令新進生當堂拜之爲師曰爾等但效法之  
即可無慚學校矣訓子尤嚴長子澄登賢書次子  
泌成進士

劉廷璧州學生舉優行家庭之間友愛特至四世同  
居與人無忤生平教授生徒以成就後學爲已任

雖脩脯缺如弗計也學使者顏其門曰品行純和  
高瑾太學生敦本睦族好善樂施里有爲財結訟者  
代爲償解之戚友子弟貧不能赴學捐脩脯送之  
入塾歲饑出私粟以濟合族貸官穀以肩一村修  
路施茶義舉累累時稱爲一鄉之善士焉

張國維乾隆庚辰舉人貧而好施倡義募捐於城北  
置地二所一掩枯骨一厝旅棺遠近目爲義舉歲  
饑有鬻媳度荒者爲捐金贖歸父病哭禱於神願  
以身代病尋愈

劉懷琮州學生幼喪父母寄養於叔父遺田七十餘畝並寄之長或教之分箸琮勃然曰吾承叔父母教育之恩真同罔極忍取產以自奉耶後以叔生計蕭條勸賣己之產為叔弟貲本比蕩盡並無怨言舌耕以事叔父母終其身如事二人焉

喬全代庠生素稱長者有後生遺金弗獲懼不敢歸欲覓死全如數畀之倩人送歸其家峪河漲發屢浸壞田畝全出貲糾鄉人壘石堤五十餘丈至今免患鄉人德之

吳傑十歲喪母事繼母以謹順聞起家多勞瘁與諸弟析箸時父欲割盈與之傑固辭不受年八旬從無失言失色得罪里黨恂謹敦和有士君子風焉  
劉芥秉性醇厚父兄早歿事寡母無不曲體孀嫂在室亦奉之維謹撫弟侄嚴而有恩族黨間里間復能力敦任卹至今猶稱於鄉云

邢國起謹厚端方與人無競一時推為長者平居施藥濟病饑歲出粟救貧死之日近村男婦無老幼莫不嘆息

郎廷勛性恬淡不慕仕進孝友敦睦樂善不倦收育  
遺棄瞽女擇配成家者三氏里人劉自榮妻郭氏  
李滿妻邢氏夫歿家貧矢志苦守勛時周卹之以  
完其節後其子孫貴顯人謂積德所遺云

董宗孔代庠生早喪父事母以孝聞乾隆乙丑歲饑  
里人多不能餬口者宗孔出穀四十餘石賙一村  
焉

郭登仕性廉介在鴈門關溝拾劉沛遺金二百訪得  
之盡數畀與沛酬以金帛不受州牧顧以燕山繼

### 美旌其門

李青雲郡庠生於古城道左拾金一封密訪旬餘知  
是清源楊秀肇之物卽慨然同劉研畀之肇不勝  
感激鳴之鄉保報舉義行州牧方給匾旌獎

### 列女

周

代夫人趙襄子姊也爲代王夫人襄子殺代王并其  
地使使者迎夫人夫人曰吾受先君之命嬪於代  
十餘年矣代王何大故主君屠殺之今代已亡吾

將奚歸且吾聞之以翁慢夫非義也以夫怨翁非  
仁也吾不敢怨亦不敢歸遂泣而呼天磨笄自殺

漢

王霸妻廣武人霸立高節而妻亦矢志行霸初與令  
狐子伯爲友後子伯相楚子爲功曹常詣霸霸子  
耕歸見客色沮怍客去霸卧不起妻問故霸曰彼  
子容服甚光兒子輩見客有慚色父子恩深不覺  
自失妻曰子伯之貴孰與君之高君何慚於子伯  
之子吾不爲吾兒慚霸起笑曰有是哉遂共隱終

身

明

御史弋福妻王氏福初家貧甚氏奉姑雖薄物必致  
精潔成化末福登進士授御史氏以姑老獨留侍  
養姑齒落不能食氏哺以乳後福卒於任姑亦憂  
死氏殯殮成禮鄉人嘖嘖稱孝事聞朝廷賜誥命  
褒贈之

杜廣妻張氏年二十一夫卒遺子幼氏矢志撫孤長  
娶婦王氏數年子亦卒王氏與姑相繼守節姑年

八十一王氏年五十而終人稱一門雙節

王才妻劉氏年十九才死孤鎮在抱氏撫訓成立舉於鄉雖年老不輕出戶庭御史齊上聞旌表

趙溫妻劉氏年十七適溫越二載而寡繼姑勸曰家貧甚新婦少何不自爲計氏泣曰婦卽饑死死亦趙氏鬼不復向他氏求活剪髮垢面勵志彌篤卒年八十有二

弋之屏妻馬氏之屏爲名諸生勤讀遭危疾向氏時頌古昔節義婦氏泣曰夫命妾妾死無二心之屏

卒遺子女各一無何子死女適人氏零丁獨處苦志以歿

王維垣妻賀氏年二十五歲維垣卒氏剪髮納棺以代殉砥志撫孤饑寒無變志其女弟適崞縣程子朝年十九而孀節如其姊焉

生員李棟妻任氏年二十棟死氏不甚哭泣越三月遺腹生子泣曰往夫死宜卽死少隱忍者恐傷遺腹耳今幸舉子爲李生後吾願足矣因囑孤於舅不食而死



冀廷威妻王氏住鴈門都堡有姿容性激烈北都被  
堡被執氏大罵曰吾良家子豈爲汝辱耶衆怒攢  
殺之且裂其屍

吳芹妻丁氏年十六芹死夜縊垂斃姑解之屏居守  
節對妯娌未嘗露齒

張堯卿妻陳氏都給舍臯謨女年二十堯卿應試太  
原卒訃聞痛絕自決齒去其四示必不他適宗黨  
推重其節

金世文妻賈氏世文死賈年二十一志甘孤苦守節

四十一年卒

趙彥妻管氏彥死管年十七誓撫遺孤辛苦萬狀守  
節五十一年卒

生員馮盛世妻李氏年少孀居志不二適里人賢之  
舉人馮明期妻王氏喜讀書素曉大義年二十六而  
孀事姑孝課子如京極嚴尤勤女工嘗曰馮氏硯  
田久嗇幸稔矣敢忘十指勞乎時稱節孝王夫人  
崇正中旌表

舉人孫嗣約妻傅氏夫亡孝姑以完節終崇正時建

坊旌表

陝西總師孫傳庭妻張氏傳庭戰歿時張駐任西安聞訃托幼子於老僕率三妾二女胥赴井死

國朝

蔡貴妻王氏年十五歸貴肅雍和睦越十載貴貿易遠方卒客邸訃聞氏矢志以殉時方抱姪家人慰止之已果舉男甫彌月會貴柩歸氏卽乘間自縊康熙二十六年建坊旌表

楊殿妻董氏性貞潔殿他出強人欲逼而污之氏罵

不絕口被毆死康熙四十年建坊旌表

馮偉妻孫氏年二十二夫亡無子誓不獨生親黨以立後勸氏忍痛擇嗣撫養娶婦曰今可延馮氏一脈矣越月嚴粧自縊時年三十七乾隆二年建坊旌表

儒士張魁儒妻楊氏年十六適張越二載而寡守節四十餘年乾隆五年建坊旌表

太學生孫章錦妻馮氏年二十夫亡事孀姑撫繼孤孝慈備至乾隆七年建坊旌表

柔銀妻溫氏生而美強暴乘間逼汚溫峻拒不從被  
毆死乾隆九年建坊旌表

生員黃秉鑰妻張氏年二十七夫病劇勸令改適氏  
哭曰倘不諱惟相從地下耳病革卽勺水不入口  
七日後乘間投繯極側乾隆九年建坊旌表

張廷瓚妻閻氏夫卒於賈訃聞痛哭矢殉孀姑防之  
嚴乘間躍入井死乾隆十四年建坊旌表

陳宮華妻閻氏爲女時事母撫侄卽以孝慈聞年十  
五適陳端重溫恭克盡婦道夫亡撫三子二女及

侄輩寬嚴有法孀姑病溲便不能自起至以手掬  
穢無難色壽八十四乾隆十四年建坊旌表

劉繼武女字金金聘而未嫁會父母出惡少趙廷喜  
乘間逼汚女忿批其頰大罵疾呼廷喜怒扼其吭  
立斃死猶手握中衣不可解乾隆十八年建坊旌  
表

高文章妻樊氏本臺人傭賃趙村鞏蘭家蘭艷氏色  
乘夫出樵潛往逼淫氏力拒不從被勒死乾隆二  
十一年建坊旌表

庠生任振翽妻白氏年十七適翽踰八年翽歿遺孤  
勵僅週歲任勤三歲氏並乳哺之後俱撫育成立  
蜚聲庠序以孝養聞皆白有以致之也年五十五  
卒乾隆二十三年建坊旌表

龐惇修妻張氏年十九適惇修惇修故苦志守節乾  
隆二十八年建坊旌表

郎起發妻馬氏因安明起強污不從致死乾隆三十

三年建坊旌表

崔永寬妻王氏性幽潔不苟言笑適永寬早寡子亦

繼亡翁老失明氏誓死守節事翁維謹里中無老  
少皆以賢人稱之壽七十七終乾隆三十八年建  
坊旌表

崔仙桃國全女也年十七依寡母李氏隣有安普娃  
者伺其母他出以污言調之仙桃喊罵普娃避去  
母歸仙桃哭訴其事旋服毒卒母控官抵普娃於  
法乾隆四十三年建坊旌表

李小小妻王氏性貞潔夫貧以巧爲業有劉四滿戲  
向其夫以穢言污之夫疑歸而責問氏大恚哭訴

於從姑卽歸室投繯死乾隆四十六年建坊旌表  
生員苑林岍妻喬氏早寡矢志守節事姑教子曲盡  
其道乾隆十八年給匾旌獎

楊世奇妻施氏年十七適世奇世奇病故矢志守節  
乾隆十八年給匾旌獎

范長厯妻李氏年十五適長厯長厯病故李守節撫  
孤乾隆二十八年給匾旌獎

庠生劉慄妻張氏夫亡年二十二念親老子幼矢志  
守節四十九年卒

武舉周桂妻陸氏夫亡守節孝養翁姑歷四十餘年  
卒州牧顧給匾旌獎

周翠雲武舉桂曾孫女許字黃嵩未嫁嵩歿雲欲往  
弔不果遂服粉父母延醫解之雲曰無以醫為但  
生為黃氏人死為黃氏鬼而已及卒言於黃得合  
葬焉

王年妻郭氏七歲時父母鬻之庠生范巖贖與乳媪  
子王年為妻年後比匪強郭以苟賤事不從抱子  
投井死

王密妻楊氏夫客死楊典衣迎喪歸語族人曰吾將與夫同日葬矣未幾果縊柩側

李安國妻張氏夫以商殂於外喪歸張自縊死鴈平道湯給以匾曰節義凜然且表其墓曰殉節烈婦  
李安國妻

高文妻高氏年二十餘夫歿未葬家長欲令改適高度不能容遂服毒焉或以解藥進高曰毒可解心不可解抗不飲藥而卒

庠生喬而野副室馬氏年十四適而野未越月而野

故馬立志守節事嫡甚謹繼幼侄為嗣撫育成立尋亦卒又撫幼孫承祖祀苦節六十二載年七十六而卒

董知妻陳氏夫病腰股不能屈伸家貧無子董憐其苦勸令他適陳哭曰吾去夫將何依憑針黹奉養其夫者四十餘年

王懷曾妻李氏年十九夫歿甘貧守節事姑極孝因歸寧父母逼令改嫁李辭歸扶柩哭曰婦不能為君事母矣遂自縊死

張烈女年十八未嫁值母外出有隣人假求火欲強  
 汚之氏喊救而隣人逸母歸告以狀母曰汝既清  
 潔明日理於官未晚也女憤不欲生自縊而卒  
 陳嶽妻武氏夫亡家貧誓不再適養老撫幼備極艱  
 辛學使稽旌以純孝完節夫洪河外縣檢書奉  
 生員李天根妻金氏夫亡家貧姑病癱不能動履金  
 朝夕奉侍穢汚不避十數年無惰容姑嘗泣謂曰  
 吾何以報汝也苦節至八十而卒十二歲平十  
 郎銘妻柳氏年二十一夫亡誓不再適事翁姑得歡

心撫幼孤至成立鴈平道謝給匾旌之年八十三  
 卒

賀瑤妻吳氏年少夫亡誓以節終年六十卒

王體禮妻郭氏年二十二夫亡日夜號泣不盥沐有

勸令改適者氏哭曰烈女不嫁二夫吾一死而已

尋服粉卒

庠生張搏鵬妻張氏夫死無子或諷以嫁張曰翁失

明姑患癱吾去將誰依生事死葬婦兼子道鄉黨

賢之

趙誠達妻畢氏夫亡家貧畢以女工為養姑育嬰之資守節三十三年而卒

孟廷桂妻胡氏年少夫死誓不他適事翁姑以孝聞年九十三卒

董學經妻張氏學經死張年二十一矢志守節孝事舅姑終身不理膏沐年八十二卒鴈平道湯以矢志完節旌其門

庠生郭才妻董氏年十九夫歿誓死守節孀姑幼子胥顛焉年八十四卒學使者給匾以旌其門

郎惠妻楊氏年二十三夫亡守節孝事翁姑撫孤成立州牧郭旌其門

監生馮至善妻郎氏年少夫亡無子郎誓以死殉舅姑泣勸曰汝死吾二人何足惜如嗣續何郎乃止後繼侄振鴻為子事舅姑撫孤兒三十餘年如一日州牧以柏舟松楸旌其門

任偉妻王氏年二十二夫死王以女工撫育二子後子婦俱亡王復撫孤孫家計益窘王志益堅鴈平道拖以匪石盟心旌其門壽八十二卒



靖寧世妻薛氏年二十八夫亡撫孤守節至死不渝

州牧郭給匾旌之年七十二而卒

庠生崔陸妻周氏夫亡年二十三遺子未週歲立志

撫孤守節四十餘年鴈平道湯以淑範堪型旌之

龐祚芳妻子氏年少夫亡撫幼子成立守節四十餘

年州牧戈以貞心恒德旌之年七十五卒

邢璧光妻周氏年少夫亡撫孤守節年五十九卒

賈自售妻王氏夫亡家貧氏躬執勤勞營心生計家

乃寢昌子舉鄉耆孫列明經氏教誨之力居多五

世同居咸稱苦節之報學使蔡給匾旌其門年九

十二以壽終

李澈清繼妻龐氏年十七適李未匝月澈清故前妻

遺子僅六歲龐撫同已出子卒撫孫閱五十餘年

如一日

閻方品妻劉氏年二十六夫歿無出舅姑亦逝或諷

之嫁劉念夫弱弟幼妹失怙無依誓守以撫育之

夫之弟亨泰感其義以子嗣之後亨泰夫婦俱亡

遺兩子一女劉復撫育如已出咸底有成閻里賢

之年七十而卒

李克寬妻郝氏夫亡遺子金舉未週歲家貧甚郝以女工撫之苦節五十四年州牧顧給額旌之

岸生張曦妻張氏年少夫亡遺子以涵年八齡張氏教必以正以涵終身凜凜不敢失德者皆母氏嚴督之力也守節三十八年而卒

周宏猷妻張氏夫亡誓不二天撫孤備極艱苦孀居三十三年而卒

邢信妻劉氏年少夫死未幾子亦逝遺孤孫家貧甚

撫養備極艱苦歷四十三年而卒

王若琦妻張氏夫亡家貧遺子天健僅八齡撫育成  
立尋亦卒又撫孫崇德訓誨入學撫孤兩世卒年  
六十有五

監生賈挺秀妻劉氏無出納妾李氏生國佐未幾挺  
秀逝兩孀共撫一孤有奪其志者屢逼之李謂劉  
曰賈門宗祀祇此一綫我兩人舍孤而去何以見  
夫君於地下誓死弗回壺守益嚴四十餘年不啻  
一日劉年六十二卒李年六十而卒

直隸代州志 卷之四  
張九成妻劉氏夫亡誓不再適茹荼守節事老恤孤兼盡其道年六十一卒

閻輝祖妻劉氏年少夫亡遺子二歲家貧甚抱子祈堂兄光祖代育欲自盡以殉光祖嘉其志周給之

苦守三十餘年六十一歲卒

喬瑾妻郭氏夫亡孀姑失明氏昕夕承歡浣滌穢惡姑幾忘其無子撫孤有成年七十而卒州牧顧旌其門曰完孝全貞

李一智妻任氏年二十三夫亡家貧借女工以事翁

姑養生送死鮮不盡禮撫孤成立娶史氏子尋歿史亦矢志守節四十餘年無愧乃姑時稱一門雙節

張啟宗妻趙氏適啟宗年十五善事翁姑克修婦道年二十八而寡遺子未歲立志苦守克底有成卒年六十七

皮匠孟有才妻逸其姓年二十八夫故家貧如洗針澣度日有憐其貧而餽以粟者氏卻之曰我此生不能酌斷不肯來生作犬馬報也年七十九卒

李先成妻劉氏夫早亡劉撫幼子以守後子亦卒劉仍矢志不移州牧書給匾曰高風勁節

賈際會妻曹氏夫亡無子痛絕欲殉爲親黨勸止繼侄孫斗南承祀娶王氏斗南夭曹哭孫感疾卧床六年時王年十九復誓守奉養同志撫孤人謂賢淑萃一門云

鄭楷妻張氏年二十七夫亡無子義不苟活因翁姑年老勉留餘生以盡孝養及歿脫簪鬢產爲喪葬具撫堂侄廷俊爲嗣三娶三亡後復遠遊不歸氏

孤苦無依死守不二年六十二卒

周臣爽妻常氏年二十五夫亡奉姑以孝撫子琬甫成立尋逝婦張氏復矢志節撫遺孤鳳翔州牧書以德門雙節旌之

郭永寧妻曹氏性端淑年十七適永寧越四載而孀矢志守節孝事翁姑繼族侄岱承祀

馮廷揚妻龐氏年十四歸廷揚越一載夫亡矢志靡他孀居三十餘載卒

張溢妻馮氏年二十五夫亡誓不再適撫孤秉誠入

學守節五十七年卒

楊壅妻魏氏性賢淑年二十八夫歿仰事俯畜曲盡

孝慈守節五十一年卒

趙達妻王氏年二十五夫亡遺子震興未歲王撫育

成立娶婦柳氏震興又卒遺孫甫二齡王復撫育

四十餘年備極辛苦年七十而卒

黃文元妻劉氏夫亡家貧誓不再適養育惟針黹是

賴學使曹以冰心柏操旌其門年七十三卒

周德懋妻劉氏年二十六夫亡家貧無子誓守終身

寡而兼獨尤屬苦節

董銳妻張氏夫歿家貧有勸其改適者張厲色拒之

奉養翁姑撫育幼子州牧書以勁節凌霜旌其門

守節三十二年而卒

魏國仕妻頡氏夫亡遺孤惇方六歲氏苦撫成人尋

歿復撫孫學詩守節六十一年卒後學詩逝妻陳

氏矢志撫孤與祖姑無少異焉

邢瑄妻王氏夫早亡家甚貧或勸之改適王曰吾可

食兩家飯耶事親撫孤苦節六十年州牧書以潛

德幽光旌其門

邢國印妻王氏年二十七夫亡誓不改適奉老恤孤  
州牧邢以節媿松筠旌其門年六十三卒

張以潛妻馬氏年二十九夫亡針黹度日糟糠餬口

苦守三十餘年卒

方密妻胡氏年二十八夫亡遺子家瑛甫四歲撫育

成人守節四十四年卒

庠生趙璵妻馮氏年二十六夫亡矢志柏舟誓不他

適守節五十餘年卒

劉元通妻王氏年二十九夫亡守節四十八年卒其

子懷瑱妻劉氏孫紹先妻王氏俱年幼夫亡堅守

數十年三世苦節後先輝映

王瑄副室張氏年二十二夫亡立志撫孤誓不再適

守節四十餘年而卒

刺忠妻丁氏年二十四夫病危與訣曰家貧如洗子

何以守婦泣曰親老子勿妾斷不厭貧他適以貽

地下憂及忠沒憑女工養老撫幼曲盡孝慈蓋師

心率已而自蹈婦德也卒年五十九

朱鏞妻畢氏夫亡有遺腹生子名應封畢誓守以撫

孤後應封亦早逝其妻李氏志姑之志無少渝焉

柴深妻丁氏事姑撫侄苦節三十餘載卒

魏國聘妻樊氏養老撫幼矢志終身卒年六十六

周鏡妻樊氏少守孤幃孝慈兼盡守節四十六年卒

魏廷妻劉氏年二十五而寡姑性嚴劉事以謹順撫

子御下整肅有體時稱女中丈夫

任信妻馬氏夫歿矢守節比松筠

蔡重信妻張氏夫亡事姑撫幼苦節終身

吳适妻張氏家貧守節終始不替

董修德妻皇甫氏夫亡年少誓志守節

張接華妻高氏夫亡子幼孝事翁姑

李祥生妻陳氏夫亡守節克盡婦道

郝琰妻李氏青年守節白首無瑕

賈觀光妻龐氏事翁撫子苦節自甘

劉雍元妻賈氏孝事孀姑誓不改適

劉良桂妻曹氏家貧守節歷久不渝

龐開修妻李氏終始完節撫孤有成

庠生張文遠妻史氏孝養雙親撫孤兩世

高俊美妻李氏夫亡守節曲盡孝養

武庠孫光裕妻徐氏早孀茹苦幽貞性成

朱應辰妻吳氏誓不二天心甘貧苦

舉人黃秉燧繼妻傅氏夫歿欲殉念孤苦守

曹倫妻李氏奉養翁姑守貞育子

李法妻王氏夫歿家貧撫孤不嫁

魏代妻喬氏恐死奉姑志不可奪

王海仁妻李氏夫歿家貧矢志守節備極艱辛

庠生李春沛妻李氏矢志守節敬事翁姑

庠生席元名妻姚氏甘貧守節撫孤成立

劉間妻趙氏撫孤兩世人稱苦節

梁大猷妻席氏孝事翁姑節凜冰霜

田成兆妻鄭氏仰事俯育苦節彌貞

龐孔修妻傅氏撫孤守節甘忍饑寒

孫廷秀妻陳氏矢志從一茹荼自甘



<p>...</p>	<p>...</p>	<p>...</p>	<p>...</p>	<p>...</p>	<p>...</p>	<p>...</p>
------------	------------	------------	------------	------------	------------	------------

